

Mei 26, 2020

www.awemainta.com

www.facebook.com/awemainta


noticia@awemainta.com

583-1400



AWEMainta

DAMA HERIDA DEN ACCIDENTE NA CRUZADA DI PALM BEACH



DIALUNA mainta algo prome cu 9'or Polis a bay cruzada di luznan di trafico na Palm Beach, unda lo a sosode un accidente y tin hende herida.

Na yegada di patruya di Noord, nan a pidi mesora pa un Ambulance, debi cu tin un dama herida.

Ambos auto a ricibi daño material grandi.

Ta trata di Hyundai Accent y un Suzuki Vitara. Na prome instante tabata wordo papia cu e luznan di trafico lo no ta trahando.

Pero ora cu agentenan di trafico a yega a bin ripara cu tur luz ta den funcion.

Por a compronde cu e Hyundai Accent a subi e cruzada for di pabou y dal contra e Suzuki Vitara.

Aki ta unda cu Departamento di Trafico mester a haci nan investigacion pa mira si e dama a pasa den luz cora.

Na yegada di Ambulance e Paramediconan a controla e dama kende tabata esun mas herida y a opta pa transporte pa Hospital.



AYERA TARDI, nos a recibi e triste noticia cu e hoben Luisann "Lui" Larez, naci na Aruba dia 8 di december 1999, pues di apenas 20 aña di edad, a fayece a consecuencia di e heridan anochi na Sero Pita. E tabata luchando pa su bida den unidad di cuido intensivo na Hospital. E tabata e otro victima involvi den e accidente pisa diasabra anochi na Sero Pita, den cual un Polis a fayece n'e sitio. Ta den su auto e Polis a bay dal, ora el a pasa un auto sortiando pa bay man robes.

Luisann "Lui: Larez a bira asina e di 3 morto tragico di Aruba su trafico.

E otro victima di accidente na Sero Pita a fayece ayera tardi

Lui Larez di 20 aña di edad tabata traha un tempo na Aeropuerto y despues na un restaurant. Obviamente awor e ta na cas sperando reapertura di e restaurantnan pa por cuminsa traha atrobe. E ta biba na Santa Cruz, pues mirando e ruta, probablemente e tabata caminda pa cas.

Na famia di e difunto ta bay nos mas sentido condolencia.

Testigo

Cuerpo Policial ta haci apelacion na testigo(nan) pa cu e accidente serio cu a tuma lugar diasabra anochi 23 mei 2020 pa mas o menos 10:43 riba e caminda Piedra Plat pa Sero Pita, na unda dos chauffeur a perde nan bida.

E dia encuestacion un auto Suzuki Swift blau numeru A-37161 probablemente

lo mester a bay pasa un Nissan March color blanco numeru A-31587 y a dal frontal den un Nissan March color licht biña numeru A-71465.

Cuerpo Policial ta haci apelacion na testigo(nan) pa tuma contacto cu Departamento di Trafico na telefon 585-2500 of celular 5975194 y puntra pa sr. Meye of sr. Solarte Tovar.

E accidente t'esun den cual e chauffeur Leonard Boekhoudt, funcionario policial, a perde su bida, y e otro chauffeur, Lui Larez, a lucha, pero ayera tardi a drenta informacion cu e tambe a fayece.

Personanan cu tabata den becindario of personanan cu por tin camara di seguridad na nan cas, tambe por tuma contacto cu Cuerpo Policial.

SADA ta dispuestu pa yuda, pero no ta di acuerdo pa kita 5% di salario



Sindicato di Aduana den un conferencia di prensa a informa decision di su miembrecia pa loke ta medidanan cu Gobierno a anuncia "tot nader orde". Miembronan ta desaproba esaki totalmente, Presidente di SADA Edward Maduro a bisa. Miembronan a dicidi cu lo

no bay den ningun tipo di manifestacion, pero informatico ta nan punto di bista riba e tema aki.

Mirando e situacion di crisis, nan ta solidario cu esnan cu lo por of a perde nan trabou, nan no a bay den discusion riba e decision di Consejo di Minister, pero si a pone algun condicion.

Prome cu e ta valido te cu 31 di december, pero tambe cu ex politico y mandatarionan mester bay of traha Pro Deo pa Gobierno.

Pero ora cu a bisa "tot nader orde", nan a dicidi cu no ta

bay di acuerdo pa kit'e for di e salario sin sa pa cuanto tempo.

E motibo ta cu nan "pensioen opbouw" ta sufri tambe "tot nader orde". A corto plaso, e miembronan ta keda cu un poco placa extra den nan salario netto pa luna.

Pues despues di tabata di acuerdo cu e ponencia of decision di Gobierno, awor SADA y su miembronan a hala atras. Nan kier p'e salario keda intacto, y nan ta dispuestu pa paga un impuesto di solidaridad.

Nos ta lamenta cu Gobierno

a tuma un decision asina di forma unilateral, y mas ainda cu a haci e anuncio y despues ta informa e sindicato. Tambe a cuestiona cu Gobierno no tabata sincero cu nan, pasobra tabata te despues di e manifestacion nan a bin tende cu e placa kita, nan lo no hay'e bek, cual no ta algo cu ta preocupa nan hopi, pero ta informan e asunto cu e lo afecta e "opbouw" di nan pensioen.

Como tal mescos cu Polis, Douaneronan no kier pa mi-shi cu nan salario sin mas.

Di acuerdo cu SIMAR

Minister Rudy Lampe no kier hala atras di decisionnan ya tuma

A delibera riba e ultimo manifesto entrega

AYERA tardi tabatin dos reunion, unda e sindicatonan, SIMAR, SEPPA y SPA a reuni cu Minister di Enseñanza, Rudy Lampe, cual reunion no a produci nada manera e sindicatonan lo a desea. Minister Rudy Lampe a duna nan di conoce cu e no tin pensa di hala atras di su decisionnan ya tuma.

Su decision ta basa riba diferente report di exterior, unda a demostra ora di fuseering, ta combini mas e docente y studiantenan. E reunion no a termina, mirando cu Minister Rudy Lampe

no kier dialoga, pero a pospone e reunion te otro siman.

E di dos reunion tabata e punto di entrega di 5%, unda e.o. SPA a laga sa di no kier pa mishi cu nan bezoldering, pasobra e ta afecta nan pensioen. SIMAR y SEPPA ta sostene e pensamento aki tambe. A dialoga, y esey ta hopi bon mes. Gobierno a laga sa cu si no kita e 5% di salario, e porcentahe tin cu bira mas hopi. Esaki ta algo pa nan studia, pa bolbe otro siman bek den un reunion mas cu Gobierno.

E sindicatonan a haya cu e di dos reunion a bay hopi bon, pasobra porfin tin un dialogo. Josito Dirksz, Presidente di Sindicato di Polis, unda e miembronan no kier pa Gobierno mishi cu nan salario. Pasobra nan penioen lo bay atras.

Parce cu por bay pafor di e bezoldegging, pero e porcentahe lo subi. Y esey lo discuti cu e miembronan di SPA kico nan ta pensa y haya un mandato di nan.

E hecho cu nan ta na mesa, a deshaci di e accion di morrocoy.

Mira loke a pasa na Corsou

No por habri frontera pa loco, e ora ey si trabao di ultimo dianan lo ta pornada

WILLEMSTAD – Ayera mainta dr. Izzy Gerstenbluth a lansa un advertencia serio na comunidad en general pa no kere cu e fenomeno di coronavirus ta pasando y cu por lo tanto por habri man dal ranca numa.

Te ne momentonan aki a test 572 hende, a constata un caso nobo y na tur tin 18 caso cu tin e contagio den estranheria y pa colmo na un lugar caminda tin hopi infeccion. E persona cu a keda identifica tin coneccion cu e di dos persona cu a identifica.

Nan ta kedando den e mesun hotel bou di vigilancia estricto.

Dr. Izzy Gerstenblum a splica cu hendenan mester keda 14 dia den cuarentena indicando cu tin hende cu ta critica e duracion di e periodo. Otro cos importante ta un liña stret pa un luna largo caminda no tabatin caso na Corsou, pero den e grupo

di repatriantenan a bin dos hende infecta.

Hende por bisa cu ta dos caso so y ta demostra cu no tin transmision local, pero si nan bira mas, tin e risico cu e ta bira infeccion local tambe.

Hustamente pa tene e transmision abou nos a nota cu ora a habri frontera cu a nota dos caso cu a bin den un grupo limita y chikito cu a drenta nos país.

Figura bo si a habri país completo loke lo bay sosode si bin tres avión grandi di Europa diariamente cu avión di Merca y avionnan for di Sur America. Lo bay haña hopi hende pareu na Corsou y bou di nan tur hende cu ta infecta.

Nos mester ta cauteloso, pasobra si habri porta pa mas caso drenta nos país for di país caminda tin risico y nos hendenan ta bay caminda nan ta, no por controla e situacion.

Lo elimina Toke di Keda diahuebs awor



AYERA mainta den conferencia di prensa di Gobierno, Minister Andin Bikke a haci un anuncio hopi importante, esta cu diahuebs awor lo elimina e Toke di Keda.

Aunke prome cu esey, a surgi un cambio chiquito, esta te diahuebs e toke di keda ta di 12or mei anochi pa 5or di madrugada.

For di diahuebs awor esaki lo ser elimina, loke ta keda tog na pueblo demostra cu nan a siña for di e medidanan y sa di comportan nan mes.

Notario Mayrène Marugg-Helmeyer ta introduci su mes

Notariskantoor Helmeyer a habri su porta



RECIENTEMENTE e oficina di notario di mas nobo aki na Aruba a habri su portanan. Notariskantoor Helmeyer bao direccion di Notario Mayrène Marugg-Helmeyer a keda inaugura pa sirbi e comunidad di Aruba.

Un oficina moderno cu un team profesional cu ta para cla y dispuesto pa yuda, conseha y duna e mihor servicio posibel.

Mayrène Marugg-Helmeyer ta un di Aruba su notarionan di mas nobo, cu un amplio conocimiento y 19 aña di experiencia como 'kandidaat-notaris'. Despues cu Mayrène a huramenta como notario, a pasa over pa forma su team y oficina.

Un team dinamico forma pa profesionan cu varios aña di experiencia den e mundo di 'notariaat'. Cu e comienso di carera nobo aki, Mayrène kier brinda su clientenan un servicio excepcional, transparente y eficiente.

Notario Helmeyer ta convenci cu e mundo di digitalisacion notariaal ta di sumo importancia y esey tambe ta locual cu su oficina ta ofrece, semper den un bon coordinacion cu diferente instancia gubernamental.

Notario Helmeyer lo duna su servicio y consehonan huridico riba diferente

tereno y na final lo traha e 'akte' necesario a base di peticion of demanda di cada cliente.

Un notario tey presente na varios momento importante di un persona su bida; por ehempel ora di compra di un cas, establece un hipoteca riba un propiedad, lanta un negoshi, pero tambe na momento di traha un testament, haci e separacion di bienes despues di un divorcio of regla regimen matrimonial ora di matrimonio.

Ta di sumo importancia pa un persona no solamente busca informacion, pero tambe tin tur cos regla huridicamente cerca un notario.

Notariskantoor Helmeyer ta situa na Schotlandstraat 38 – Unit 2 (schuins dilanti Banjolux) y ta habri di dialuna pa diabierna for di 8'or di mainta pa 12'or di merdia y for di 1'or y mei pa 5'or di atardi. Por semper yama y traha un afspraak na 280-2020 of manda un email na info@notarishelmeyer.com.

Banco di Caribe ta habri na orario di custumber diaranson dia 27 di mei 2020

Banco di Caribe ta contento di por anuncia cu ta habri na orarionan di custumber, diaranson 27 di mei 2020. Pa purba mantene nos oficina 'Covid-Proof', ta pidi cooperacion di clientenan pa tuma nota di algun adaptacion den servicio. Tur servicio, cu excepcion di servicio na caha, ta rekeri un cita.

Banco di Caribe ta enfatisa cu e medidanan relaciona cu COVID-19 ta keda vigente. Pa motibo di esaki, nos lo mantene reglanan di higiena y distancia social vigente.

Aplicacion facil y liher Online

Ta recorda tur cliente cu ta posibel pa regla asuntonan bancario 'online'.

Entrante diahuebs 28 di mei 2020, clientenan por haci uzo di www.bancodicaribe.com si mester aplica pa un fianza, tarheta di debito of credito, MultiCard, servicio di SMS Alert of BdC Online. Tur cliente cu lo mester di asistencia personal por haci un cita; manda un e-mail na infoaruba@bancodicaribe.com.

Banco di Caribe semper a para pa digitalisacion cu un toke personal, esey mes ta haci cu BdC Online ta facil pa uza.

Bale la pena pa explora e website awor cu Aruba ta costumbrando cu e 'normal nobo' y cu distancia social ta di sumo importancia.

Tuma nota di orarionan di Banco di Caribe

Banco di Caribe ta habri di 8'or di mainta pa 4'or di atardi, di dialuna pa diabierna.

Banco di Caribe ta pidi cooperacion di su clientenan si na momento di aplica e distancia social por causa tardanza ya cu lo permiti unicamente un cierto cantidad di hende simultaneamente den banco. Pa mas informacion por bishita nos website.



Nos ta habri na e orario di custumber!

Entrante diaranson 27 di mei 2020, Banco di Caribe ta habri na orario di custumber.

Dialuna pa diabierna, 8 AM - 4 PM, servicio di caha sin cita y tur otro servicio cu cita.

Entrante 28 di mei 2020 por bishita nos website pa aplica pa un fianza, traheta di credito, tarheta di debito, Multicard, Servicio di SMS alert of BDC Online.



Tel: +(297) 523 2250
www.bancodicaribe.com



BANCO DI CARIBE

Restart Conversations e prome cumbre virtual organisa pa Career IQ a ricibi un gran sintonia y participacion



DURANTE e prome tres dias abranan den luna di mei miles di persona a sigui e prome cumbre virtual di Aruba organisa pa Career IQ. E meta principal di e conferencia virtual aki tabata pa crea oportunidad pa tene e discusionnan den e areanan di Economia, Entrepreneurship, Turismo, Inovacion y Comunidad.

Naturalmente esaki a sosode teniendo na cuenta cu e situacion cu mundo y Aruba ta pasando aden cu Covid-19.

Career IQ a logra stimula combersacion entre tur e participantenan pa pensa con pa por “restart” Aruba durante y despues di e crisis mundial aki. E cumbre virtual nan a haya bon aceptacion den comunidad, y Career IQ a haya hopi preguntanan cu tempo no a duna pa contesta nan. Pesey den juni Career IQ lo sigui cu “Follow up Conversations” unda e pregunta nan aki lo haya nan espacio.

E cumbre virtual aki a culmina cu e di tres y ultimo parti cual tabata e sesion di inovacion y comunidad. Primeramente tabatin un presentacion di Varelle Croes, cu ta Chief Innovation Officer di Gobierno di Aruba, riba e tema di inovacion na Aruba durante y despues di Covid-19.

Despues di esaki a sigui di biaha un discusion entre diferente profesional riba tereno di inovacion den sector priva y publico, unda nan a combersa riba e topico al caso cu moderacion di drs. Ryon Dijkhoff, miembro di e ekipo organisatorio di Restart Conversations Virtual Summit.

Ademas di esaki Darice Solognier co-fundadora di Career IQ a duna un presentacion cortico tocante e “15

ideas challenge” cu Career IQ book club a hay como reto di Simon Sinek, escritor internacional, mediante un reto pa nos comunidad bin cu 15 idea nobo pa restart Aruba. Esaki a conta cu un participacion di nos comunidad cu 925 idea nobo.

E mesun iniciativa aki a conduci n’e siguiente paso pa Career IQ, esta e Follow Up Conversations.

Despues di esaki Kareline van der Linden co-fundadora di Career IQ a duna un resumen di tur tres diasabra y tur topico cu a discuti y asina tambe recorda e publico y e participantenan riba e tips valioso cu a comparti y tambe e pensamentonan discuti durante e diferente combersacionnan entre e panelistanan cu tabata invita pa participa.

Pa clausura e Restart Conversations Virtual Summit, Layhing de Kort-Yee a duna un presentacion hopi conmovedor, cu a inspira nos comunidad pa tuma accion positivo cu por yuda un otro den e temporada di incertidumbre cu nos ta aden.

Career IQ ta sumamente satisfecho di por a brinda un cumbre virtual pa prome biaha n’e publico di Aruba cu sigur tabata bon atendi y mira. Despues di e cumbre virtual aki hopi participante y mirones a comenta di a keda inspira y sigur a haya motivacion pa haci movecion dor di e programacion.

Henter e ekipo organisatorio di e cumbre virtual den persona di: Darysse Croes, Sue-Anne Lee, Marisol Sanchez Maldonado, Ryon Dijkhoff, Darice Solognier y Kareline van der Linden kier a extende nan palabra di gradicimento na tur e participantenan y partners.



Robert Candelaria: Gobierno cu intencion di crea un departamento nobo den Ministerio di Enseñansa den pleno crisis

Gobierno ta bahando gastonan robes. E siman nos tras Robert Candelaria a trece dilanti caba cu tin hopi pregunta encuanto con Gobierno ta scoge su prioridadnan. Nos ta den un situacion financiero sumamente delicado dor di Covid-19. N'e momentonan aki nos mester pa un y tur focus con pa pone e finansa publico na ordo y reduci gastonan inesesario mas liher posibel. Aruba ta dependiente di ayudo financiero di Hulanda y nos ta mira cu e loke Hulanda ta spera ta pa nos Gobierno reduci su gastonan p'asina por ricibi sosten financiero. Nos nunca por permiti nos mes spera yudansa financiero di Hulanda, siendo cu na cas mes nos Gobierno mes ta sigui paga hendenan hopi placa sin cu esaki ta nesario of hasta inhustifica.

Locual Hulanda ta exige di reduccion di gasto di Gobierno ta afecta te hasta nos cuidio medico. Aki mester baha gastonan di AZV cu 5 miyon florin pa luna, cu lo nifica 40 miyon florin menos e aña aki. Gobierno ta actualmente den pleno discucion cu algun sindicato riba diferente topico.

Un di e manera cu Gobierno kier cumpli cu Hulanda ta cu reduccion di sueldo di empleado publico. Gobierno a corta den bezoldiging di ambtenaren, siendo cu nan a pidi pa bin cu un belasting temporal. Asina por sigui menciona hopi otro ehempel pa kico nos ta den un situacion social, economico y financiero hopi critico y Hulanda ta wak cada paso cu Gobierno ta tuma. P'e motibo aki Gobierno mester ta hopi cauteloso con e ta gasta cada florin den e temporada aki y ta pesey ta di opinion cu Gobierno mester re-evalua su proyectonan. Laga nos evalua algun area awe unda Gobierno mester seriamente evalua su prioridad y su maneho si e ta respeta su trahadornan y ta reconoce e delicadesa di e situacion financiero cu nos t'aden.

CONTRACT LUCRATIVO NOBO PA HUUR DI EDIFICIO

Nos a tuma nota cu fin di aña pasa Gobierno a stop e huur pa DPL den e edificio di APFA. APFA ta e pensioenfond di Gobierno y ora cu paga huur na APFA, Gobierno ta invertiendo directamente den e pensioenfond di nos ambtenaren cu ta yuda mantene e fondonan saludabel. E suma cu Gobierno tabata paga APFA tur luna tabata ta Afl 21,450.00. E huur aki a wordo cancela, pasobra Gobierno kier a muda DPL p'e edificio na Engelandstraat 33 cu ta conoci como edificio di Andina Ice pa un suma di Afl 33,362.00 pa luna. E mudamento aki ta nifica un aumento di Afl 142,944.00 pa aña.

Nos ta puntra dicon esaki ta necesario, mirando cu ta stop un huur na APFA cu ta beneficia pensioenfond di Gobierno y Gobierno ta regla contract cu su hendenan pa Afl 11,912.00 adicional pa luna. Nos ta comparti e documentonan pa pueblo mes mira e sumanan aki.

Tur esaki tumando lugar net awor cu Gobierno, mas cu nunca mester busca solucion nan pa reduci su gastonan. Pero ainda nos ta mira cu Gabinete Wever-Croes ta sigui aumenta gastonan y beneficia hende mey mey di e crisis. Mescos cu Otmar Oduber ta beneficia sponsor di partido.

Mescos cu e edificio aki, tin mas ehempel di contractnan cu ta ser duna dor di Gobierno den e temporada aki cu nan mester ta bahando nan gasto. Tin hende cu a perde algun porciento di nan sueldo, pero tin cu a perde tur cos. Nos no por permiti cu nos Gobierno ta sigui gasta placa inesesariamente asina den pleno crisis.

CREACION DI DEPARTAMENTO NOBO DEN PLENO CRISIS

Un otro ehempel cu nos ta cuestiona ta cu nos a tuma nota cu preparacion nan ta tumando lugar pa un departamento nobo den Ministerio di Enseñansa. Lo ta bon pa Minister splica esaki, mirando cu ta trata di un departamento nobo cu casi 40 empleado.

Nos ta puntra nos mester cuanto lo ta ambtenaren nobo y cuanto ta bin di otro departamento cu Minister di Enseñansa ta bezig ta hef op contra e mandato di Parlamento. No por t'asina cu ora ta reduciendo salario di ambtenaren pa yuda carga e situacion difisil cu nos tur ta aden, Gobierno via un otro ruta ta funda departamento nan nobo cu hende nobo y sueldo halto.

TA SIGUI PAGA HELICOPTER Y NA MES MOMENTO TA CORTA SUELDO

Robert Candelaria a menciona recientemente cu e helicopter ta costa nos pueblo aproximadamente 200 mil florin pa luna, siendo cu nos por sera un deal cu Kustwacht pa nan helicopter haci e mes trabou pa mas tanto ora y tur esaki pa menos placa. Gobierno por haci hopi cu Afl 200 mil pa luna, na lugar di sigui paga p'e helicopter. Awor cu Gobierno mester negosha cu Hulanda pa haña paquete financiero di ayudo cual ta mara na condicion manera reduccion di salario di empleado publico pa yuda salba empresa nan y pa mantene hende den empleo, Gobierno mester elimina tur gasto inecesario. No mester stop cu e servicio di helicopter, pero por stop cu e contract actual cu ta sumamente halto. Por haci e mes of mas trabou pa menos placa.

Ban spera cu Gobierno por demostra cu e ta pone nos pueblo prome cu orguyo personal. Aki nos ta bolbe hasi un apelacion riba Gobierno pare-evalua prioridadnan financiero. Gobierno mester re-evalua si awor ta momento pa mantene contract di e helicopter. Gobierno mester re-evalua gastonan cu nan ta haciendo den Futura. Inovacion awor ta mas necesario cu nunca, pero e inovacion mester ta un cu ta na beneficio di tur ciudadano y no un grupito so.

INOVACION DI GOBIERNO NO TA NA BENEFICIO DI PUEBLO

Inovacion tin ora ta costa placa, pero e return on investment den inovacion mester wordo mira den su ayudo diecto pa pueblo. Futura no por demostra esey awor.

E beneficio di inovacion awor mester ta p'esnan cu tin e mas dificil den nos comunidad. Futura awor ta beneficia un grupito di Gobierno so. Pueblo en general no ta gosa di dje awor. E ta costa pueblo placa so, cu awor ta necesario otro caminda.

TA SIGUI PAGA COORDINADOR Y TA CORTA DEN PAGO DI AMBTENAAR

Gobierno mester corta den su gastonan di coordinadornan. Gobernantenan mester di bon consehero pa nan por haci nan trabou, pero den e situacion cu nos ta, aki ta caminda pa cuminsa corta gasto. No por corta prome serca e empleadonan publico cu tur nan añanan di servicio. No por corta nan entrada den un forma cu pa nan lo afecta nan negativamente sin corta den e gasto di coordinador.

Si ambtenaren ta pidi pa un belasting temporal na lugar di mishi cu nan bezoldiging Gobierno mester honra esaki. Gobierno lo gana dor di paga menos sueldo, y e empleado ta gana pasobra e ta sinti cu a scucha y honra su peticion. Nos ta convenci cu ora kier pidi Hulanda sosten financiero, Gobierno mester por demostra cu el a haci su ehercicio prome pa wak unda por corta su gastonan. Nos no por ta pidi Hulanda placa, siendo cu na cas mes nos Gobierno ta pagando hendenan hopi placa inhustamente.

Nos mester por convence Hulanda cu nos ta un partner serio y confiabel den Reino. Despues di a scucha Raymond Knops y algun miembro di Tweede Kamer papia, nos mester muestra cu como pais nos a "shape up". Si prome tabata importante pa evalua nos gastonan y baha unda por, awor e ehercicio aki a bira esencial. No tin espacio mas "business as usual", e miembro di AVP, Robert Candelaria a conclui.

The Casino at The Ritz-Carlton, Aruba

Lo habri pronto como Aruba su prome casino non-smoking

Bishitantenan di casino lo por disfruta di un experiencia superior den un atmosfera mas fresco y saludabel



PARTICIPACION IMPORTANTE

En conexcion cu e situation actual di e Virus Covid-19 nos di AWEMainta ta pidi cooperacion di nos clientenan, pa tuma contacto cu nos via nos e-mail nan;

noticia@awemainta.com

toko@awemainta.com.

Sales via sales@awemainta.com.

Of via nos telefoon; 583-1400.

Tambe nos ta pidi cooperacion pa por haci tur pago via Online Banking.

Pago nan por wordo haci via nos cuenta bancario di **CMB # 22982600**.

Danki pa e cooperacion di semper.

The Casino at The Ritz-Carlton, Aruba a anuncia nan decision pa bira un non-smoking casino ora nan bolbe habri na luna di juni, como parti di hotel y casino su enfoke riba limpieza.

“Nos a tuma e decision boluntariamente pa haci nos casino non-smoking pa bienestar di nos huespednan, bishitantenan y e damas y caballeros di The Ritz-Carlton, Aruba,” a bisa sr. Steven Redkoles, Area General Manager di The Ritz-Carlton, Aruba.

Nos normanan di exigencia a wordo eleva na un aun mas halto. Dia cu hotel y casino bolbe habri na luna di juni, nos lo haci esaki cu e enfoke maximo di crea un ambiente mas fresco y saludabel.

The Casino at The Ritz-Carlton, Aruba, preferi pa su bishitantenan como e mihor experiencia di casino na Aruba, ta ofrece e mihor Tier Program cu beneficio y eventonan unico, servicio personaliza, diferente wega di mesa y un seleccion grandi di e ultimo slot machines, entretenimento – y awor, un ambiente completamente liber di huma.

E damas y caballeros di The Casino at The Ritz-Carlton, Aruba ta ancioso pa ricibi tur su bishitantenan pronto. Pa mas informacion tocante The Casino at The Ritz-Carlton, Aruba, por bishita www.ritzcarlton.com/aruba of por tuma contacto cu e Casino VIP Desk na 527-2276 / 527-2277.

Pone bon atencion:

Tur prikpost di LabHOH ta traha segun afspraak so!

ALGUN siman pasa a introduci e sistema di traha cu afspraak so na tur localidad di LabHOH cu e meta principal pa evita aglomeracion. Durante aña nos a custumbra cu e sistema di “walk in” na cualkier prikpost di LabHOH, pero mester a cambia esaki den cuadro di e COVID-19.

E meta principal ta keda higiena y distanciamiento social pa proteha tanto pashent como personal di LabHOH. Tene bon na cuenta cu si no tin cita no lo por atende bo persona. Pa traha un cita por yama LabHOH di dialuna pa diabierna di 7am pa 3pm na **527- 4901**. Ta pidi tur pashent pa meld na bali maximo 5 minuut prome cu bo cita y no mas pa evita aglomeracion di hende.

N'e prikpost situa na Hospital tin e orario di 7am pa 3.30pm y na prikpost di Oranjestad di 6.30am pa 11.45am. Na Piedra Plat ta habri di 6am pa 10.45am y na San Nicolas (banda di Arubus) ta habri di 6.30 am pa 10.45am.



Por favor tene bon cuenta cu e cambio aki menciona. Nos ta pidi pa aplica un bon higiena di man y tene distancia social na tur prikpost.

Y si bo ta sinti un di e e sintomanan di COVID-19 keda cas y yama bo dokter di cas p'aisna sigui su intruccionnan.

CMB a anuncia

Extension di periodo di moratorio

Pa clientenan Comercial y Personal

Caribbean Mercantile Bank lo extende su moratorio riba pagonan mensual di prestamo comercial, personal, hipoteca y tarheta di credito p'e lunanan di juni, juli y augustus 2020. E pagonan incluso interes lo keda suspendi p'e tres lunanan menciona.

E pagonan aki mester wordo cumpli na final di e termino di e prestamo. E prestamo y/of hipoteca lo wordo extendi cu e cantidad di luna (den e caso aki 3 luna) cu e prestamo a keda suspendi.

Caribbean Mercantile Bank lo no cobra interes y tampoco gasto adicional riba e pagonan cu a keda suspendi pa prestamo y hipoteca. Clientenan cu a haci uso di e moratorio di 3 luna pa maart, april y mei 2020 cu a pasa, pues awor lo paga e montantenan suspendi den 6 (seis) pago igual (p'e pagonan suspendi di: maart april, mei, juni, juli y augustus 2020) un luna despues di e fecha cu e prestamo of hipoteca actual vence.

Mensahe importante p'esnan cu no kier haci uso di moratorio:

Por favor bishita e siguiente pagina riba nos website cmbnv.com: Moratorium Opt-Out.

Yena den e formulario online p'asina nos por cancela bo moratorio..

Mester haci esaki prome cu 12 di juni, 2020.

Pa mas informacion, por favor Live Chat cu nos via eAmigo Online Assistance na www.cmbnv.com, of tuma contacto cu nos via 522-3000. Tambe por bishita nos paginan di Facebook, Instagram of Twitter pa cualkier update.

Den e temponan dificil aki tambe nos kier a yama bo danki pa bo confiansa den nos banco.

Hunto nos lo lanta bek.

Prestamonan personal cu tin mas cu 90 dia di pago atrasa, NO ta bin na remarke.

Polis a topa cu mucha muher agresivo na San Barbola



Liña di telefon pa 60+

280-0505

GRATIS

8 OR DI MAINTA - 8 OR DI ANOCHI

BAN COMBERSA Y NO PREOCUPA

DIADOMINGO banda di 4'or di atardi, a pidi asistencia di Polis na un adres den San Barbola. Polis a yega rapidamente n'e adres y a bay atende cu e situacion. Na nan yegada, nan a bin topa cu un mucha muher, kende tabata comporta su mes agresivo. Tabata sospecha cu e por tabata bou di influencia di un of otro substancia.

Mirando e condicion di e mucha muher a dicide di pidi asistencia di Ambulance. Nan a hiba e mucha muher hospital pa un mihor tratamiento medico.

Pa seguridad di e pashent y e personal di Ambulance, un agente policial a acompaña'e te hospital. Na hospital e mucha muher a logra di calma full y no tabatin motibo mas pa Polis keda.

Un biaha mas:

Ultimo minuut prome cu TdK accidente serio na Brazil



TABATA algun minuut prome cu 11or di diadomingo anochi a sosode un accidente basta serio. Faltando algun minuut prome cu Toke di Keda bay na vigor e auto a dal. E accidente aki a sosode den e birada skerpi riba e caminda di Brazil bay pa Mabon.

Ta trata di un auto blanco tipo sedan cu tabata biniendo for di Famia Supermarket. E chauffeur a perde control y dal un pal'i luz kibra y bay para algun meter leu.

E chauffeur di e auto a resulta seriamente herida cu cortanan basta profundo na man.

Polis a confisca e auto, mientras cu N.V. Elmar a ser avisa.

El a dal den un cura di cas tambe. Parce tabatin un otro auto involvi y Polis a topa cune bandonando e sitio. A para e chauffeur tambe pa atende cune y purba confirma cu e ta involvi.



Alarma a wordo bati momento cu Sea-Doo a bolter riba lama na altura di Ritz Carlton




Departamento di Asunto Social

Nos t'ey pa bo!

SERVICIO SOCIAL

SAVANETA, SAN NICOLAS Y BISINDARIO:
528-1130

PARADERA, PIEDRA PLAT, NOORD Y BISINDARIO:
528-1140

STA. CRUZ, DAKOTA, O'STAD, PONTON Y BISINDARIO:
528-1120

Servicio di entre otro:

- ✓ Ta duna sosten, guia y conseho
- ✓ Duna guia con pa maneha placa
- ✓ Ta intermedia pa comestibel
- ✓ Ta intermedia cu utilidadnan

Mas informacion:
www.das.aw

DIADOMINGO anochi den careda di 8'or Strand Politie y Maritiem Politie a wordo manda pura na altura di Ritz Carlton, unda cu un of mas persona lo a haya problema riba lama.

Na yegada autoridad a compronde cu esnan cu a haya nan den problema tabata riba un Sea-Doo.

Total tabata trata 3 persona, di cual uno ya tabata na tera. Segun informacion e Sea-Doo lo a bolter y un persona a landa yega tera y a bati alarma.

Pero, algun minuut despues esnan cu no por a yega tera dor di e biento fuerte tambe a yega sano y salvo. Polis a puntra nan si mester di asistencia medico, pero segun nan esaki no tabata necesario.

Parlamentario Shailiny Tromp-Lee (MEP):

Durante reunion di Comision Fiho di Labor y Sector Primario, representantenan di Union di Piscado a haci diferente peticion na Parlamento

DIA 18 di mei 2020 como Presidente di Comision fiho Labor y Sector Primario drs. Shailiny Tromp-Lee a yama un reunion cu Union di Piscado.

E reunion a keda yama a base di un carta habri cu sr. Arthur Giel (Presidente di Union di Piscado y di Hadicurari) a pone riba Facebook dirigi entre otro na Parlamento.

E reunion tabata uno cu a bay den bon ambiente caminda e Representantenan di e organizacion sres. Arthur Giel, Dirksz y Laurence a presenta diferente punto di preocupacion y desapunto. Alabes nan a entrega peticion specifico pa loke ta trata cambio di ley cu ta limita of perhudica e piscadonan. Nan a acentua e descontento creciente bou di piscadornan aki na Aruba. Nan ta sinti cu nan a perde tereno y a keda negligha pa hopi aña. Durante reunion nan a enfatisa cu cada biaha ta bin cu mas prohibicion cu ta kita nan derecho y ta caba cu nan tradicion di piscamento.

Nan a subraya cu nan ta contra prohibicion, pero ta pro regulacion! Algo cu sigur Parlamento mester tin oido pe y mester bay sondea e posibilidad con pa crea e balance necesario caminda nos pais ta cumpli cu tratadonan y na mes momento ta percura pa salvaguardia e interes economico y custumber y tradicion di pesca y nos piscadornan. Como Parlamentario durante tratamiento di presupuesto 2018 y 2019 sra. Tromp-Lee a pidi atencion caba pa diferente punto cu nan a presenta y Gobierno a informa cu nan tabatin un Comision cu ta traha riba esakinan. Lamentablemente e resultado di nan trabou no a keda presenta ainda.

Algun tempo atras Gobierno anuncia cu nan lo bin cu cambio pa medio di un LBHAM, pero esaki no a cristalisa ainda. Un punto cu sigur Shailiny Tromp-Lee ta bay informa con leu e ta y pa ki tempo nan lo presenta esaki. Sigur mediante un LBHAM Gobierno por trece e algun di e cambionan desea.

Alabes e ta bay follow up riba e trabounan di e comision aki riba menciona y mira con leu nan ta cu nan conseho y sugerencia. Alabes ta bay cuminsa sondea e posibilidad pa duna oído na nan peticion pa bin cu un Ley di Iniciativa pa bin cu regulacion na lugar di prohibicion.

Den tur e procesonan menciona Tromp-Lee ta pidi pa den e trabou involucra e piscadornan cu sa mas di e materia y crea cu nan ta carga e cambio y trece e alivio necesario.

Durante reunion nan a trata entre otro e siguiente prohibicionnan durante reunion:

A prohibi Calco, 1987: A prohibi Turtuga, 1992: A prohibi spearfishing, 2001: A prohibi piscamento na Spaans Lagoen, 2014: A prohibi varios especie marino, particularmente Gutu y Kreft, 2017: Piscamento na baranca etc.

Piscadornan ta di opinion cu piscamento ta nan tradicion, nan cultura y nan derecho. Piscamento ta un fuente di cuminda p'e pueblo humilde. E ta tambe pasa tempo pa grandi, chikito, pober y rico. Piscamento ta algo tipico y autentico riba nos isla, hasta uza den masha hopi promocion turistico.

Na su opinion nos mester por crea un balance entre proteccion di nos naturalesa y e ofishi y tradicion di piscamento.



Shailiny Tromp-Lee ta di acuerdo cu e ponencia cu metanan di Desaroyo Sostenibel mes ta papia di seguridad di cuminda y combati pobreza y cu aki na Aruba nos ta indica cu piscamento sigur ta hunga un rol importante den esaki. P'e motibo aki mes e ta di opinion cu mester por crea e condicionnan necesario pa enberdad haci esaki posible.

Na final di reunion nan a pidi nos pa nos intermediacion pa loke ta trata suavizacion di e ora di salida y yegada di piscadornan relaciona cu toke de queda, cual Gobierno a duna oído na e peticion specifico aki.

Por ultimo nan a pidi atencion di Parlamento na e practica di buscamiento di pisca for di botonan Venezolano. Algo cu sigur no por sigui keda tolera y cu como Parlamentario e ta bay pidi Gobierno pa duna e debido atencion pa preveni cu e practica aki por sigui continua.

Mama y tata a condena abuso policial

Mama a graba accion di Polis contra su yiu na Paradera



DIADOMINGO anochi un violacion di trafico na rotonde di Tanki Flip a conduci na henter un show Policial na Paradera. Tur cos a cuminsa ora cu e homber L.M. biba na Paradera cerca su mayornan a pasa e rotonde di direccion contrario. Polis a reconoce riba e scooter. A dune un señal pa stop, pero el a sigui direccion Tanki Leendert.

E tabata bay direccion su residencia cu ta cas di su mayornan. E Polisnan riba caya a haya instruccion pa evita persecusion. Si nan sa kende e ta caba, evita peliger riba caya.

E unidadnan di Polis a bay na dos adres. A bay n'e cas unda e ta biba y na cas di su pareha. Na cas di e pareha a baha busca su drechi, pero no a topa cune. A keda tira bista n'e cas tambe di e mayornan.

E helicopter di Polis mientrastanto a señala e scooter riba e caminda banda di Caiquetio. Eynan a avisa e patruyanan cu a prepara pa su yegada na cas di e mayornan. Ora cu el a yega nan a acerke y den e discusion cos a bay for di man. E mayornan cu a mira henter e situacion pafu di tanto Polis contra nan yiu a core graba tur cos. E mayornan a haya cu ta un abuso nan a haci contra nan yiu.

E bromer tin tur su papelnan y nan ta sinti cu un control tabata suficiente. Dimes algun agente no a aprecia e grabacion y hasta kier a interumpi e grabacion cu e mama tabata haciendo. Asina mes e mama a keda insisti cu e ta riba su tereno y e ta graba loke e kier.

Un otro persona n'e sitio tambe Polis a bay riba dje y mande tera. E situacion no tabata facil y hasta refuerso a pidi n'e adres na Paradera.





Na final a hiba ambos persona deteni pa Warda di Polis p'asina presenta nan dilanti un Sub Fiscal. E tata a mostra e Polisnan e papelnan di e bromer for di prome instante y a hinca e scooter den cura. Djey un agente a bisa cu e lo confisca e bromer.

E mayornan no a haya cu esaki ta corecto. Nan a bisa Polis cu mescos cu cualkier otro control di trafico, nan a bay cu nan yiu y e vehiculo por keda atras. Esaki t'e procedura normal cu tur hende ta mira ultimo lunanan. Den e caso aki e Polisnan no kier a haci esaki y a bisa cu por bay check cu Fiscal p'e scooter confisca. Tur esaki e mayornan a graba tambe.

Na final varios unidad di Polis di diferente distrito a bay den accion. Hasta e helicopter a lanta buelo pa un scooter cu a pasa verboden na rotonde Tanki Flip.

Ta basta energia policial tabatin pa algo asina chikito cu a pasa. Ta depende bo record, cierto Polis kier monta show riba bo manera a pasa diadomingo anochi na Paradera, tabata comentario di e mayornan.

Participacion



TUMANDO masha na serio e caso di COVID-19 (Coronavirus) na Aruba y sigui cu recomendacionnan di Gobierno, gerencia di AWEMainta ta ofrece tur esnan cu kier sigui noticia, pa registra pa recibi tur dia, sin mester di sali for di nan cas AWEMainta, GRATIS. Y asina ta keda altanto di loke ta pasa na Aruba y rond mundo.

Ta pesey AWEMainta como e prome corant digital tin e circulacion mas grandi. Bisando esaki, nifica cu tur esnan cu ta desea di pone nan advertencia den AWEMainta, nan ta mas cu bon bini. Nos tin tarifanan masha economico, pa yudabo cu bo benta.

Banda di e corant digital, tur hende por sigui e noticianan di AWEMainta riba nan website y tambe via nan facebook.

Djies type www.awemainta.com

Tur hende cu ta desea pa manda nan noticia y/of nan advertencia, por haci esaki mandando esaki na noticia@awemainta.com.

Y asina lo yudabo keda den contacto cu tur persona cu abo ta desea.

Laga AWEMainta t'e vehiculo di bo contactonan.

Danki p'e confianza

Gerencia di AWEMainta






Royal Aurora

Funeral Home & Crematory

"Senor ta mi wardador, mi no tin falta di nada
Den cunucu di yerba berde E ta pone mi sosega.
E ta hiba mi na awa tranquil, pa mi bolbe haja forsa"
Salmo 23

Nos tin e tristo deber di anuncia fayecimento
cristianamente di nos esposa, tanta, cuña, tanta grandi:



Sra. Reginita "Shonita" Michaud-Dirksz

*31 July 1945 - †27 April 2020

Mama: †Isidonia M. Dirksz Croes

Tata: †Jose Maria Dirksz

Na number di su:

Esposo: Narcisse Michaud

Rumannan:

†Dichi Dirksz y esposa Fabiola Dirksz Osorio y yiu

†Nicks Dirksz y yiu

†Esi Dirksz y esposa Sobella Dirksz Roos y yiu

Sobrino(a)nan:

Martha y esposo Arie Maduro y yiu

David y esposa Annie Dirksz Vrolijk

Silvia Dirksz y yiu

Shamila Dirksz

Luz Maria Dirksz Osorio y yiu

Su ex cuña: Lucia Geerman Croes

Tur su compañero/a nan y Staff di Paviljoen pa nan bon
cuido duna na Reginita.

Primo y prima nan

Su amiga nan: Martica Lampe, Carina Maduro y
yiu, Candy Maduro, Ingrid Jacobs.

Demas famia: Michaud,

Dirksz, Croes, Maduro, Vrolijk, Osorio, Roos, Oduber,
Dubero,
v/d Linden, Kock, Lampe y Geerman.

Acto di entiero lo tuma lugar diamars 26 di mei 2020 di
9'or pa 11'or di mainta na Aurora Funeral Home, despues
saliendo pa Santana catolico na Sta Cruz

Royal Aurora

Funeral Home & Crematory

Gradicimento / Invitacion



Cosma Geerman-Ras / Mama Tina

*27-09-1927 †27-04-2020

Pa medio di esakinos kier a gradici tur esnan cu di un of
otromanera a companianosdurante emomento nan
dificil di inmensodolor y tristeza cu fayecimento y
entiero di noskerida y estimada Mama.

Un danki especial di curasonatur yiu(n) y nieta(o) nan
cu tabatateydia y nochicuMamadurantesuenfermedad
ymuy especial durante e ultimo fin di siman. Na Edward
y crew cu a hasi tur nanmaximoesfuerso pahasisosibel
cutur yiu(n) y famianan den exterior poraatende e
entieroenbibo tanto nafunerariacomoden santana.

Dr. Wassenaar durante e promeraña nan di enfermedad
yhenter e team di Oncologie, danki di curason pa
egui,sosten y atencion cu boso a dunaMama durante
tur e añanan. Danki di curasonnaDr. Anthony, Ayrine y
demassitentnan cu semper tawataclapadunaayudo y
sostendurante Mama suenfermedad.Dankinapersonal di
Botica Central pa tur e bon guia y consehonan. Na tur
verpleegkundig nan di Wit GeleKruispa e pasenshi y bon
cuido. Na Mama suasistentenanEuri y Krystle pa e
dedicacion y cu hoopi amor aatende.

Na Legion di Maria Santa Cruz pa tur e oracion nan hasi
cu Mama, orahaspeticionpaesey y boluntariamente.

Na tur esnan cu a companianosdia di fayecimento y
durante e dia di entiero tanto naRoyal Funeral y na
Santana. Na tur esnan cu a manda flor, carchi y
tambedankipa y palabranan di consuelo y alimento

spiritualviajamadan di telefon, wzp y mailnan cu nos a
ricibi.Bosomuera di atenciontabata y lo keda un gran
consuelo pa nos. Y sin lubida e staff y personal di Aurora
Funeral Home.

Alaveznos kier a invita tur famia, amigo y cono(n)ir nan pa
unSanto Sacrificio di Misa pa recorda e promerluna di
fayecimento di noskerida y stima Mama Tina aribadiar-
anson 27 mei 2020 pa 7'or di anochinamisa "Immaculata
Concepcion" na Santa Cruz. Despues di Misa lo tin un
Santo Rosario nacasaSanta Cruz304.

Di partinoskeridaMamasuyiu(n):
Jacenta, Rebecca, Mena, Anchi, Fachi, Reina, Sita, Macca,
Chito y Dina.

Royal Aurora

Funeral Home & Crematory

Mi tin Dios como mi wardador,
pues mi no tin falta di nada



Edgar Nelson van Cleef

Mihor conoci como GACHI

*10 November 1961 - † 23 April 2020

Na number di:

Su mama: † Linda Faro van Cleef

Su tata: † Tommy van Cleef

Su yiu(n): Nelsi van Cleef y Maika van Cleef na Hulanda
Mama di su yiu(n): Mildred Werleman

Su rumannan:

Wilhelmus Marco (Cheo) van Cleef

Judith (Didi) y Betho Sint Jago van Cleef

Anthony (Nini) y Mary van Cleef y famia

Su subrina: Jamilet y Gerald Almanzar Sint Jago y famia

Su tanta: Filomena Faro y famia

Su omo: Chico Faro y famia

Primo y primanan y demas famia

Full su famia di RCA pa bida

Su amigonan di Prikichi Supermarket

Tur su amistad cu a stim'e, specialmente Sharin y Abelo
di Welcome Back Snack

Masha masha danki pa tur loke boso a haci pa Gachi y
pa stima Gachi

Di parti di su yiu(n), nos ta bisa un danki na su subrina
Jamilet Sint Jago cu a wak pa y atende nos tata tur e
tempo nan ki. Di curason, masha danki.

Acto di despedida lo tuma lugar diasabra 30 di mei 2020,
na Club RCA di 7:30 pa 8:30 di mainta y despues na
Aurora Funeral Home di 9'or pa 10'or di mainta. Crema-
cion lo tuma lugar despues.



Pareha ku a muri na Santo Domingo....

Yunan dje esposo tin ku heredá herensia di kasá dje homber

WILLEMSTAD. Un pareha di nashonalidat ulandes ku a bai pasa nan luna di miel na Republika Dominikana algun tempu pasá a toka e mala suerte di a muri mesun dia desues di a kome kuminda venená.

Nan a kasa sin separashon di bienes i famianan dje muhé a buska abogado pa reklamá e parti di herensia di parti dje muhé i Korte di Hustisia a hañé ta atendé un kasouniko den historia legal sivil.

E pùzel ku e tribunal mester a resolvé ta ken te herederonan dje dos personanan ku a muri tras di otro.

E muhé a muri promé i despues e homber a muri mesun dia manera nos a bisa kaba, na Republika Dominikana.

Pa kolmo e pareha no tabatin yu i e herensia lo a bai pe famianan segun lei di herensia.

Kodigo Sivil tin regla riba repartishon di herensia i pasobra no tabatin testamento, pa regla ta herederonan dje homber ta beneficiario dje herensia, no famia dje muhé.

Pero korte den promé instancia no a apliká e regla aki i ta den apelashon Korte di Hustisia a tuma desishon i a dikta ku ta solamente bou di sirkunstansia extraordinario por desvia di regla.

Korte di apelashon a disidi ku no ta extraordinario ku e homber i e muhé no a pensa riba e posibilidat ku nan lo muri tras di otro sin a traha testamento ni a pensa riba e konsekuensianan huridiko dje kaso.

Parlamento tempu nan a traha lei a tene cuenta seriamente ku un situashon asina i a disidi ku no ta kambia lei.


Por lo tantu e tribunal di apelashon a haña ku no ta inaseptabel ku e fortuna dje muhe via herensia ku a keda pa e homber a bai pa yunan dje homber i no famianan dje muhe.

Royal Aurora

Funeral Home & Crematory

Den cunucu di yerba berde e ta ponemisosega
E ta hiba mi naawatrunkil,
Pa mi bolbehayaforsa.
Salmo 23

Cu inmenso tristeza den noscurasonperoconforme cu
boluntad di Dios y pa tur locual e la significa pa nos, nos
ta anunciafayecimento di nos tata, welo, bisawelo,
ruman y omostimanaedad di 74 aña



Modesto Kock

Mihorconocicomo: "Tiew, Tui, Tutu"
*25-04-1946 - †21-05-2020

Na number di su:
Señora: Felicia Tromp

Yiunan: Jorge Tromp y Francisca
Sabina Tromp
Melisa Tromp
David Tromp
Elvin Tromp
Lucio Tromp y Monik
Anthony Croes

Nieto(a)nan: Vincent, Belkys, Richiline,
Gina, Nuri, Marijean, Davis, Shakira,
Shirley y Shirlyne

Bisanieto(a)nan

Rumannan: Sara Laclé-Kock y famia
Henry Kock y famia
Julian y Buelah y famia
Rosendo y famia

Cuñanan: Ivonne Kock-Martijn
Josefa Tromp
Yolanda Tromp
Antonia Geerman

Tanta: Aura Kock

Sobrino y sobrinonan, primo y primanan, comper y
comernan, amigo y amiganan, bisañanan, conocirnan, ex
coleganan di Compra NV, ex hungado di SV Estrella

FamianannaHulanda, USA, Surnam, Venezuela y Costa
Rica y demasfamia

Si den nos tristeza nos por a lubida algun famia of
conocirnos ta pidinos mas sincero disculpa.

Adres pa condolencia: Fiyostraat # 29

Acto di entierro lo tumalugardiamars 26 di mei 2020 di
1'or pa 3'or di atardina Aurora Funeral Home, despues
saliendo pa Santana central na SabanaBasora.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemisosega.
E ta hibaminaawatrunkil,
Pa mi bolbehañaforsa".
Salmo: 23

Cu inmenso dolor nanoscurason, peroconforme cu
boluntad di Dios, nos ta anunciafayecimentotragico di
nosestimadoyiu, compañero di bida, tata, ruman y omo



Leonard Anthony Boekhoudt

"Boegje"
*27-10-1985 - †23-05-2020

Acto di entierro lo wordoanunciadespues.

Royal Aurora

Funeral Home & Crematory

Pa medio di esaki yiunan kier a invita tur famia, amigo(a),
conocir pa asisti na 3 Santo sacrificio di Misa pa recorda
fayecimento di nos
inolvidabel mama y wela stima:



Adelinda Vrolijk-Rozenberg

Cual lo tuma lugar na Misa Santa Filomena na Paradera
diadomingo 24, diamars 26 y diahuebs 28 di mei pa 7'or
di anochi. Despues di ultimo misa lo tin un rosario na
cas; Caya Frere Laurentius # 23

Bo(so) presencia lo ta altamente aprecia



AWEMainta

E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL

extra

Grátis

BONERIANO®

WWW.
EXTRABONEIRU.COM

Djaluna 25 mei 2020

.....ketu bai number unu!

SEKURA PISÁ I SOFOKANTE

Yatenan ta sigui yena bahia



Yatenan di tur parti di mundu ta sigui yega Boneiru. Bahia di Kralendijk ya ta kompletamente yen di yate. Tin eksonerashon pa nan mara, pero kumpliando ku kondishon i regla ku outoridatnan ta pone. Foto saká ayera tardi ta mustra kuantu yate tin mará na kosta wèst di Boneiru. Extra a haña reklamo serka un persona ku ta puntra kon gobièrnu ta pèrmití awor pa pone propagana riba laman, mirando e bòrchi pa propagá Chogogo Boat Rental.

90.5 mion dòler na konstrukshon

KARA BONERIANO



Ryanne 'Yanny' Jacobs ta yu di Stany Jacobs i Raimy Ellis. El a biba 11 aña na Hulanda. El a regresá Boneiru ku e meta pa yuda su komunidad. E tin hopi interes den plantashon i produsí su propio kuminda. E ta dediká hopi tempu na su hòfi i hasi trabou boluntario.

Pronóstiko di tempu



Leve te parsialmente nublá i seku

Ta leve te parsialmente nublá i lo keda seku. E temperatura máksimo lo ta aproksimadamente 32°C, e temperatura mínimo mas o ménos 27°C. E bientu ost ta moderá te basta fuerte, 4-5 Bft.

Altura di ola: aproksimadamente 2.0 m (5-7 pia)

* Altura di ola válido pa laman grandi

Durante e temporada di orkan, KNMI ta vigilá minusiosamente e Oséano Atlántiko den koperashon ku e National Hurricane Center (NHC). E pronóstiko mas resien ta disponibel via <https://www.nhc.noaa.gov/gtwo.php?basin=atlc&fdays=5>

SEKURA PISÁ I SOFOKANTE

KRALENDIJK -- Tin un sekura pisá i sofokante ta asotando Boneiru último dianan. Segun e instituto 'Drought and Precipitation Monitoring Network (CDPMN), ku base na Barbados, durante e promé mitar di e temporada aktual di sekura, tin un distinkshon bon kla den e kondishonnan di tem-

pu entre e islanan nort i sùit di Karibe Oriental. E islanan ABC, situá tambe den sùit di Karibe, pero mas pabou, tambe ta eksperensiendo sekura ekstremo.

Tin un preokupashon grandi ta eksistí riba islanan di Caribe, asta den paisnan situá na e kosta

nort di Sut Amérika, tambe Sentro Amérika, manera Belize, Guyana Franses i Sürnam, na unda nan ta premirá ku na fin di yùni riunan di e paisnan aki lo bai sufri konsekuensia di e sekura ekstremo aki, segun un informe emití pa CDPMN.

Islanan di Karibe, ku eksepshon di Bahamas, lo bai sufri hopi. Nan reservanan di awa bou di suela lo keda afektá. Di akuerdo ku e boletin di CDPMN, e periodo di sekura ku lo ekstendé den yùni, lo afektá e islanan ABC -- Aruba, Boneiru i Kòrsou --, igualmente Barbados, Islariba, e parti ost di sentral Belize, ku eksepshon di Dominica, Sürnam i Trinidad and Tobago.



Por ripará na Boneiru por ehèmpel ku loranan a bolbe dreña área residencial pa buska kuminda, meskos tambe burriku, ku ta move te asta den Playa último tempu aki.

Animalnan den na-

turalesa, manera yuana i paranan tambe ta sufri hopi. Na vários sitio den mondi por topa ku yuananan hopi suak òf morto. Pues asta yuana, un bestia ku por resistí sekura bon, no por ku e sekura pisá ku tin aktualmente.

GRADISIMENTU

Famia di defuntu

sra. vda Irma Colastica

Peternella-Simon

mihó konosi komo Mashishi òf Mai



ta ekstendé nan gratitut na tur ku a apresia i stima Mai na bida i a duna sosten te na ora di su partida. Un danki speshal na Funeraria Olive Tree ku a hasi e livestream pa tur ku no por tabata presente.

Señor ta mi wardadó, lo ki no tin falta di nada -Salmo 23:1-

Ku honda pena nos ta partisipá morto repentino di nos kerido

Luguén Gregory

Alexander Crestian

mihó konosi komo Oe òf DJ Scorpion

*29-08-1979 120-05-2020



Na nòmber di su esposa:

Celine Crestian-Rosaria

Rumannan:

Robert Sances, esposa i yunan
Dorothy van den Heuvel, esposo i yunan
Nelsen Crestian, esposa i yunan
Charlon Crestian, esposa i yunan
Giovanny Mercera i yunan
Edgar Janga, esposa i yunan

Suegro i suegra: Luis i Frisia Rosaria-Emerenciana

Tanta i tianan, prima- i primunan, kuñá i suá, madrina i padrino Kenneth Vinck, amigu- i amiganan, bisña-, i konosinan, koleganan di trabou, koleganan di radio i D.J.

Famia: Crestian, Melaan, Sances, van den Heuvel, Rosaria, Emerenciana, Vinck, Lugo, Curiel, Velez, Sint Jago, Wijngaarde, Mercera, Janga, Ridderstaat, Pop, Heinze, Molina, Sarmaart, van den Assen, Anthony, Marchen, Domacassé, Bernabela, Balentien, VerherIst, Reyes-Sanchez, Rooi, Manuela, Boezem, Johannes, Sintjacob, Gonzalez, demas famia na Aruba, Kòrsou i Hulanda

Si den nos tristesa nos por a lubidá nòmber di un famia, nos ta pidi nos diskulpa pa ku esaki.

Akto di entierro ta tuma lugá djaweps 28 di mei. Ta kuminsá risibi bishita di kondolensia for di 1'or pa 3'or na Misa La Birgen di Coromoto, ta sali 4'or pa santana Katóliko na Playa.

Famia ta pidi ku por asisti den trahe alegre.

Den cuadro di desaroyonan rondó di COVID-19 tin ahuste nesario segun reglanan konosi i stipulá pa EBT.

Despues di entierro NO por risibi bishita di kondolensia na kas.



Kere òf laga di kere, pero ami personalmente no tin problema ku e echo ku debí na coronavírus no por biaha aktualmente. Naturalmente no ta un situashon sano sí, pasobra Boneiru su ekonomia ta dependé di turismo. I e echo ku Boneiru no por risibí turista ta pone ku plaka no ta drenta Boneiru via sektor di turismo. E ta afektá trahadónan hotelero, personal di restaurantnan, kompanianan ku ta hür outo, taksistanan etc. Esei ta di lamentá.

Loke mi kier men ta e echo ku ami no ta sinti nesidat di biaha. Boneiru ta dushi. Mi gusta di ta riba e isla aki. Boneiru ta mi isla, mi kas, mi hogar. Ta aki mi mester ta i niun otro kaminda. Hopi dushi mes. Ta ku doló na mi kurason mi ta sali Boneiru e último añanan. Ta pa komplasé mi yunan òf pa trabou.

Tin hende ku tin e impreshon ku mi gusta biaha i ku mi ta biaha hopi. No ta bèrdat. E aña aki por ehèmpel ta ún biaha m'a sali for di Boneiru pa Kòrsou pa tres dia pa trabou, esta hasi grabashon di Herensia na Kòrsou. Anto promé ku esei tabata for di 7 di sèptèmber mi tabata pafó di Boneiru. Motibu ku e impreshon aki ta eksistí ta pasobra ku ora mi bai Kòrsou pa graba Herensia, mi ta graba por lo ménos 5 programa pa dia. Pues den tres dia 15 programa. Hende ta remarká ku mi ta biaha hopi, pasobra nan a mira ta graba na Kòrsou. Pues esaki ta e splikashon.

Te ainda por ehèmpel nos tin sigur 7 programa ku m'a graba na febrüari último na Kòrsou ku no a pasa ainda. Normalmente nos ta pasa 1 programa Herensia nobo di Kòrsou na TeleCuraçao. Esun otro di wiként na un programa di Boneiru. Pa siman nos ta saka dos programa nobo di Herensia. Nos mashin di produkshon di Herensia ta funshoná bon. Anto banda di Herensia nos tin tambe e programanan 'Aki Boneiru' òf otro isla.

Loke ta preokupá mi sí ta ku nos a kai atras ku grabashonnan na Aruba. E aspekto finansiero ta hunga un ròl. Nèt nos tabata preparando pa bai e asuntu di coronavírus a kai aden, kòrtando nos alanan. Awor nos ta rondia pa wak algun programa grabá na St. Eustatius ku nos no a èdit ainda, pa asina nan por pasa.

Ku proyektonan na Tilburg

Jason Oleana sakando kara di Boneiru

KRALENDIJK— Durante su estudio na Rotterdam Jason Oleana tabata sa ku e lo ke bai biba den e siudat Tilburg. Esei a sosodé tambe manera ku el a terminá su estudio di ekonomia komersial na Hogeschool Rotterdam. Na universidat di Tilburg Jason a sigui un pre-master i tambe un master den 'data science'. Simultáneamente ku su estudio Jason a kuminsá ku su negoshi 'Genius Voice'.

Durante siman di introdukshon na Universidat di Tilburg Jason a sera konosí ku dos otro studiante, Luuk i Dylan. Mesora nan a klek i a resultá den un amistad. "Nos tur 3 ta studia na Universidat di Tilburg, pero kada un otro direkshon. Ami a studia 'data science', Luuk pr/marketing i Dylan ta den e parti

tékniko."

Luuk ta esun ku a bini ku e idea pa hasi algu ku na Hulanda ainda no ta masha konosí, esta 'voice assistance', manehá aparato ku uzo di bos.

"Tabata un idea ku nos a bai di akuerdo kuné mesora", Jason ta splika. "No solamente pasobra tabata un bon idea, pero loke nos kada un a studia nos por a pone den práktika tambe. 'Data science' ta un estudio relativamente nobo i ta Universidat di Tilburg so tabata ofresé esaki.

Den komienso mester a wak unda nos lo por a ofresé nos servisio."

"Aktualmente nos ta trahando ku munisipionan di Tilburg, Utrecht i Dongen riba un asina yamá chatbot. Chatbot ta un sistema outomatisá kaminda ta yuda un kliente online dor



di un robòt ku ta remplasá e hende ku normalmente lo ta sinta tras di kòmputer. Den futuro nos lo ke bai hasi tambe uzo di voice-bot, kual ta uzo di bos enbes di skibi e mensahe. Sigur pa hendenan ku problema ku bista esaki lo ta un tremendo solushon, komo nan por hasi uzo di nan bos pa komuniká ku, den e kaso aki, instansianan di gobièrnu."

Jason Oleana: "Ahinda nos ta den periodo di prueba i ta spera di pronto di por tèst e servisio ku kliente. E vishon ta pa aki 5 aña Genius Voice ta e lider den merkado ku nos produkto i ku esaki ta funshoná sin ningun problema."

Banda di tur esaki Jason tabata duna lès di bachata tambe. "Esei tabata mi distraishon` despues di un dia largu di studia."

Si a mantené nos biodiversidat intakto, por a evitá coronavírus

Pèrdida di bioversidat ta pèrdida parti di humanidat

KRALENDIJK -- Nashonnan Uní ta para ketu riba e fecha di 22 di mei komo Dia Internashonal di Biodiversidat. Atròbe gobièrnu di Boneiru a laga e dia aki pasa sin saka un komunikado pa hasi su opservashon, siendo ku biodiversidat ta algu importante. Pasobra na momentu ku pèrdè biodiversidat nos ta pèrdè tambe un parti di humanidat.

Hopi mas

Ora papia di Biodiversidat den mayoria kaso ta pensa den terminologia di mata, animal i mikro-

organismo. Esaki riba su mes ta korekto, pero biodiversidat ta muchu mas ku esakinan so.

Por pensa tambe riba diferensianan genético entre espesienan di mesun sorto, por ehèmpel mata-nan, variashon den sistema ekológiko (riunan, desierto, mondi etc).

Rekursonan biodiversiko ta e pilá riba kua humanidat ta forma su sivilisashon. Piská ta kontené 20% di proteina pa 3 bion hende. Mas di 80% di hende su kuminda ta bini di vegetashon.

Na momento ku pèrdè

biodiversidat esaki ta forma un menasa pa tantu hende, bestia komo naturalesa, pues tambe salu di hende. Esaki por konduzí na loke nos ta eksperensiendo awor aki ku vírus di corona, un enfermedat ku ta pasa di bestia pa hende, siendo ku si mantené nos biodiversidat intakto, por a evitá.

Konsiensia

Di otro banda mester elogiá ku mas i mas humanidat ta birando konsiente di kuida i konserva loke tin rondó di dje. Lástimamente pa sierto espesienan esaki ta bini poko lat, komo ku dor di komportashon humano hopi ta menasá di stòp di eksistí.

Programanan di konsientisashon ta loke mester hasi humanidat mas i mas

konsiente di importansia di biodiversidat. Ku esaki na mente Nashonnan Uní ta dekrétá 22-5-2020 komo e fecha pa internashonalmente para ketu riba biodiversidat. Lema di e aña aki tabata: Nos solushon ta den naturalesa; (Our solutions are in nature).

Un kos ta sigur; por bini tur sorto di avanse di teknologia, echo ta ku humanidat ta kompletamente dependiente di su rekursonan ekológiko, manera awa, kuminda, elektrisidat etc.

E tema 'Our solutions are in nature' ta enfatisá riba importansia pa huntu traha riba tur aspekto ku ta di importansia pa traha riba un futuro kaminda hende i naturalesa ta biba den harmonia ku otro.

JiaXing Supermarket

ta buska

un supervisor

-mester tin 4 aña di eksperensia

Pa mas informashon yama telefòn

782-7437

PA PENSA ARIBA: Si bo no por ta un strea na shelu, e ora ei ser un lampi den bo kas.

KASO DI ENOC. E notisia mas impaktante di siman pasá tabata e pèrdementu di Enoc Melaan den mondi pa nort di BOPEC. Despues di un búskeda intensivo, hasiendo uso di helikòpter, drone i empleadonan di KMar, a logra haña e persona aki tur agotá den mondi. Helikòpter a deskubrié afortunadamente nèt na tempu. Por komprondé ku a traslad'é pa Kòrsou tòg, anke su situashon ta stabil, pa mas atenshon médiko.

E kaso aki tabata ampliamente komentá riba media sosial siman pasá, manera a bira kustumber, rondoná pa tur sorto di teoria, profilashon propio di yen di eksperto i sabí, dòktor di mondi etc. Hendenan ku nunca a kana den e mondinan di Wasao i Labra tabata bini dilanti pa duna tur sorto di splikashon i teoria.

Loke sinembargo kasi nos no a lesa ni tende ta ki trabou un kuerpo manera VKB por a hasi den un suseso asina. VKB desde 1995 bini ariba tabatin un unidat hopi spesialisá den kana mondi, hustamente pa por a aktua den tipo di situashonnan asina. Den e tempu ei e unidat spesial aki di VKB a krusa vários mondi, konosé desafío i peligernan di mondi, pa hustamente por arma e tipo di akshonnan di búskeda aki.

E unidat aki, tambe otro miembronan di VKB, a sigui por ehèmpel un kurso pa siña e téknika i abilidad pa por traha ku mapa i kompas, loke ta un materia riba su mes den militarismo, esta 'kaart en kompas'. A invertí basta plaka den esaki. Algun wikènt a bini for di Kòrsou teniendo di VKC Soemanta pa duna e kurso aki. Soemanta di profeshon tabata un nóutiko, ku a siña pa stürman, i ku tabata traha komo lots na Kòrsou.

No ta djis ta tira un par di hende den mondi pa bai buska un hende pèrdí. Tin sistemanan di búskeda den forma efektivu. Bo ta siña den militarismo kon bo ta 'kam af' un teritorio, manera nan ta bisa na hulandes. Traha ku mapa i kompas, añadí awendia ku tur sorto di aparato sofistika.

Nos ta kere ku awor ku e kos aki a pasa, ta bon pa KPCN (polis) i KMar



(marechaussée) laga orguyo un banda i pidi hendenan ku por duna nan treinen den e abilidadnan aki. Bo tin na Kòrsou sigur militarnan stashoná ku por hasié. Ademas lokalmente tambe algun persona ku konosé mondi, e desafío i peligernan ku tin. No lubidá ku e paisahenan di mondi ta kambia, entre otro debí na yobida, di manera ku treinenan asina mester bira algu strukturá. Pues no un biaha so, anto ta kla.

PA PENSA ARIBA: E kaminda di mas largu ta esun kaminda bo ta trompeká.

TEP BALIOSO. Mientrastantu nos ta kere ku ta na su lugá pa duna algun tep balioso pa hendenan ku ke bai mondi grandi. Pa di promé, no bai bo so. Buska un òf mas kompañé. Algu por pasabo den mondi. Bo por kai, dal kabes, suék i asta kibra pia òf otro parti di kurpa. Si tin un hende huntu ku bo, e por buska yudansa.

Laga miembronan di famia, en todo kaso un òf mas hende, sa na unda bo(so) ta bai den mondi, na unda boso ta para outo, etc., ki ora boso ta pensá pa regresá mas tardá.

Bai ku telefon. Mayoria di telefon di awendia tin e posibilidat pa bo manda bo lokashon, esta unda bo ta. Esaki sigur ta yuda pa haña bo. Sòru pa bateria di bo telefon ta bon kargá. Tene kuenta sí ku tin áreanan den mondi ku telefon no tin alkansé. Ta dependé si ta Chippie, Digidel òf Kla. Di hende ku por sa nos a komprondé ku Kla ta kubri mas teritorio di Boneiru ku e otronan. No ta propaganda pa Kla, sino ta loke un eksperto a informá nos.

Un di e kosnan di mas esensial ta awa. Mas tantu awa posibel den bo

rùgzak. E por ta pisá pa karga den kuminsamentu, pero tene kuenta ku segun bo ta kana e ta bira ménos. Aparte di awa kisas ta bon bai ku un bòter di Gatorade di-fris. E ta duna energia den situashonnan ekstremo. Tambe algu di fruta òf e buskuchinan di fruta, manera Sultana. Tin mas sorto i marka.

Mas aleu nos por rekomendá un flèshlait chikitu pa usa si eventualmente anochi sera. Chèk pa baterianan ta yen. Un spil chikitu tambe ta bon, ku kua por manda reflekshon di solo komo señal. Pa manda señal tambe un bon flùit ta rekomendabel. Tambe lusafè, un bòter di Glacial pa uso múltiple, entre otro tambe pa yuda bo sende kandela pa duna di konosé bo posishon. Huma den dia i klaridat di kandela anochi. Tambe no lubidá pleister òf fèrbant.

Loke tambe ta bon pa tin huntu ku bo den mondi ta un bon machete. Rekomendabel tambe pa bai ku un ròl di 'duct-tape' pa múltiple uso, pero spesial pa teip bo sapatu òf kèts si e kibra. E teip aki ta yuda hopi bon.

Naturalmente tin hopi mas tep ku por duna. Esakinan ta djis algun di nan. Tuma nan na serio, evitá problema i te asta skapa bo bida. Mondinan di Boneiru no ta ko'i hasi wega kuné.

PA PENSA ARIBA: Stima bo besinanan, pero no kita e waya òf muraya entre boso kuránan.

ATA NOS AWOR! Semper a bisa ku Boneiru mester diversifiká su ekonomia i no keda dependé solamente riba turismo komo e úniko pilá. No tin niun partido ku no a yega di menshoná esaki den nan programan di akshon. Pero despues ta lubidá atrobe. Anto awor ku turismo a kai afó debí na coronavírùs tur hende ta na hala di palu.

No tin turista. No tin buelo internashonal mas pa Boneiru. Hotèlnan ta bashí i mester a manda trahadó kas. Danki Dios ku tin un areglo pa paga esnan ku a bai kas 80% di nan salario pa wak kon por krusa e dianan aki, sperando riba habrimentu di espasio aéreo di Boneiru pa buelonan for di Oropa i Merka. Tambe nos haf pa barku di turista.

Aworakí ku palu a kue nos kurpa, na nos opinion, ta bon momentu pa reflehá i analisá. Awor ta momentu di bini ku konferensianan pa diskutí e situashon aktual pa mira kon ta bai sigui. No warda pa despues ku kos normalisá. E ora ei nos ta lubidá tur kos atrobe i bai kai den nos rutina anterior.

PA PENSA ARIBA: Bo no por biba solamente di amor, pero sin amor tambe bo ta muri.

PRODUKSHON DI KUMINDA. Produkshon di nos propio alimento tambe lo mester bai ta un punto di diskushon serio aworakí i den futuro. Ta probá kaba ku tabata por i ku lo por. Nos mester stòp di keda yora tokante awa.

Tuma ehèmpel riba e plantashon di Bon Tera. Delaster un bèrdura ku nan ta produsí ta ku awa di WEB. Nada di awa di kloaka manera tin hende ta pensa. Esei no tin mag mes. Awa di kloaka ta destiná pa matanan di fruta ku ta krese bai haltu. No pa bèrduranan di blachi manera spinazi, warmus etc. I ta usa niun gota di awa purifiká di kloaka riba tereno di Bon Tera.

E punto ta ku mester usa e awa skars i kostoso ku tin den un forma efisiente i efikas. Esaki nan ta hasi na Bon Tera. I tin posibilidat, tin teknologia, manera un sorto di sustansia pa planta aden trahá di koko, ku nan ta importá for di Hulanda.

PA PENSA ARIBA: Esun ku aktua den harmonia ku su besindario no ta topa ku resistensia.



Tin kos bon tambe ta sosodé. Reporteronan di Extra a topa ku grader di Rafael Damascus ta drechando kamindanan di kunuku. E kamindanan aki den sierto área ta basta deplorabel.

90.5 mion dòler na konstrukshon

KRALENDIJK -- Etienne van der Horst, hefe di e direktorado di R&O (Espasio i Desaroyo), a trese dilanti den reunion fiho di Konseho Insular ku tin

hopi interes pa konstrukshon na Boneiru. Su direktorado mester prosesá hopi petishon pa konstrukshon di kas i edifisio komersial. Aña pasá R&O a otorgá

314 pèrmit di konstrukshon na un balor total di 90.5 mion dòler. Esaki a generá na 'leges' un montante di \$ 335.943,-- pa gobièrnu.

"Mi no por bisa kua di e konstrukshonnan aki a keda kla. Kontròl di esaki ta kai bou di e direktorado di 'Toezicht en Handhaving'.

Nos ta sòru pa atendé e petishon i saka e pèrmitnan di konstrukshon", Etienne van der Horst a komentá.

Herensia pa e siman aki na NOS-TV

John Schermer i Benny Marchena

KRALENDIJK -- John Schermer ta den e programa nobo di Herensia e siman aki na NOS-TV djamars. Djaweps e programa ta kompartí entre Aida Rooi i Benny Marchena, un boneriano bibá hopi aña na Kòrsou.

Schermer no ta un deskonosí den Herensia. Den pasado el a yega di bini mas biaha den e programa. Anteriormente e aña aki Schermer tabata atrobe na Boneiru -- e ta biba na Hulanda -- i tabata den Herensia pa papia riba algun

tópiko interesante. Entre otro tokante su ideanan relashoná ku orígen di idioma papiamentu. E programa aki ta djamars anochi pa mitar di dies na NOS-TV, ku diferente ripitishon.

Benny Marchena ta un bishitante di Pro Bista na Kòrsou, na unda e ekipo di Herensia a bishit'è pa papia tokante su bida. Den e otro mitar ta papia ku Aida Rooi, tambe bishitante di Pro Bista. E programa aki ta djaweps mitar di dies di anochi na NOS-TV, kanal 24 di Flamingo TV.



KRALENDIJK -- Lider di frakshon di Demokrat Clark Abraham tin problema ku e echo ku gobièrnu ta sobra kada bes asina tantu plaka ku a reservá riba presupuesto. Aña pasá esaki tabata e kaso atrobe. A sobra 9.1 mion dòler.

Abraham den e reunion

di komishon fiho di Konseho Insular a indiká ku gobièrnu tabatin un 'onderbesteding' di 5.7 mion dòler aña pasá, poniendo ku a sobra e 9.1 mion dòler aña pasá. "Si a sobra plaka, pero a logra loke e planea, lo mi aploudí gobièrnu. Pero

esaki no tabata e kaso. Esaki ta mal trabou. Kon bini a keda sin usa 5.7 mion dòler ku a presupuestá?"

Clark Abraham a eksigí splika di gobièrnu, banda di e sifranan presentá, di kiko a bai robes den su maneho aña pasá.

Clark Abraham:

Mal trabou di gobièrnu

2.7 mion dòler ta bai pa kònsultent

KRALENDIJK -- Un montante di 2.7 mion dòler a bai di parti gobièrnu di Boneiru pa paga kònsultent aña pasá. Esaki a bini dilanti den e reunion di komishon fiho di Konseho Insular. Ta buska kònsultent na diferente okashon, pasobra gobièrnu mes no tin suficiente empleado ku preparashon pa hasi sierto trabounan spesialisá.

Konseho Insular tabatin diskushonnan basta

profundo den su komishon fiho pa atendé e asina yamá 'uitvoeringsraportage' di 2019. Hefe di Finansa Dudley Wedervoort a hiba palabra, huntu ku otro funshonario di e departamentu aki.

Tantu oposishon komo miembronan di Konseho Insular a hasi opservashon crítico tokante e sumanan haltu ku ta paga kònsultent. Por komprondé ku den seno di kompanianan di

gobièrnu tambe ta saka basta plaka pa paga kompanianan di kònsultent.

E echo ku ta hasi uso di kònsultent, segun a bini dilanti, tin di aber ku e echo ku difísilmente ta haña hende pa okupá tur puesto den e aparato gubernamental. Pa e trabounan sigui kana ta atraé kònsultent ku vários spesialisashon. Naturalmente tin basta plaka embolbí ku esaki.

Hopi aksidente di tráfiiko riba espasio pa stashoná outo

KRALENDIJK -- Tin hopi aksidente di tráfiiko, dalmentunan chikitu di outo, ta tuma lugá riba espasionan pa stashoná outo, den kua daño material ta embolbí. E ta un desaroyo interesante. Kasi no ta pasa un dia ku no ta yama e instancia konserní pa atendé e tipo di dalmentunan aki.

E aksidentenan aki ta debí ku shofùrnan no ta paga tinu na momentu di dreña òf sali e vaknan pa stashoná outo. Nan ta bèk sin mira bon ku si tin outo ta pasa i ta dal. Ta trata di dañonan mínimo, pero ku di otro riba un kantidat grandi

ta embolbí basta plaka na daño material.

Un funshonario ku ta akudí na sitionan di aksidente di tráfiiko a yega di splika Extra ku por a evitá hopi di e aksidentenan aki simplemente si a paga mas atenshon.

Espasionan pa stashoná outo na unda ta registrá mas dalmentu ta esun di Aeropuerto Flamingo, Plasa Medardo Thielman. Pero den Centrumgebied Kralendijk i espasionan pa stashoná outo na supermerkadonan grandi, manera Van den Tweel i Warehouse, tambe ta demasia do.



Foto ta mostra un funshonario di e kompania ku ta atendé ku investigashon di aksidente di tráfiiko hasiendo su trabou riba tereno di stashonamentu dilanti Kooyman.

Diputado Elvis Tjin-Asjoe a bishitá Bon Tera

Un pareha hóben ku pashon pa hortikultura

KRALENDIJK -- un pareha hóben, Arie i Tessa Boerstra, ta praktiká hortikultura na nivel komersial. Arie i Tessa ta hasi e trabou aki basá riba nan pashon. Trabou duru, pero nan satisfakshon grandi ta ku mas i mas

hende ta haña kaminda pa Bon Tera, situá pariba di e anterior plantashi Aruba.

mandatario tabata di bishita na e kunukunan di Win Emerenciana i Gio Paula den e área di Punta Blanku. Na kunuku di Win Emerenciana tin e produkshon di mas grandi di webu na Boneiru, sufisiente pa kubri henter e merkado boneriano. Ta trata di 12 mil webu pa dia.

Tin algun djasabra kaba ku diputado Tjin-Asjoe ta bishitá kunukeronan lokal pa papia ku nan i mira kiko tur asina nan ta hasi na nan kunuku riba tereno di hortikultura i krio di bestia. Anteriormente e luna aki a

Despues a sigui kunuku



Nos ta kla pa yuda bo via telefón na Boneiru



Tur djaluna di 9'or pa 11'or di mainta (ora lokal) ora di konsulta telefónico.

Algu a bai robes entre abo i un instansha gubernamental, opvang pa mucha, skol òf un instansha ku ta ofresé kuido médiko na mucha? Durante e ora di konsulta e tim di Nationale ombudsman i Ombudsman pa mucha gustosamente ta wak kiko nan por hasi pa bo.

E ora di konsulta ta tuma lugá na papiamentu, hulandes òf spañó.



Manda e e-mail na spreekuurCN@nationaleombudsman.nl. Mensioná bo nòmber, number di telefón i na ken ta dirigí e pregunta; **Nationale ombudsman** òf na **Ombudsman pa mucha?**



Riba **djaluna** entre **9'or i 11'or di mainta** e tim lo **tuma kontakto** ku bo via telefón (dianan di fiesta no ta inklui).



de Kinderombudsman.

[dekinderombudsman.nl](https://www.dekinderombudsman.nl)

de Kinderombudsman.



nationale ombudsman

[nationaleombudsman.nl/cn](https://www.nationaleombudsman.nl/cn)

Nationale ombudsman Caribisch Nederland



tandprothetische praktijk
BONAIRE
tandprothetische praktijk



AKI TA TRAHA I DRECHA PLANCHA PA DJIENTE. BO TA WARDA MIENTRAS NAN TA DRECHE, SERVISIO RAPIDO.

djaluna pa djaweps: 9'or mainta pa 12'or merdia, 2'or te 4'or di atardi.

djabieme: 9'or mainta pa 12'or merdia, atardi ta SERA.

E.M. Rijswijk

Por yama pa un sita na tel. 717-2248 òf selular 796-3714 Kaya Dr. J.G. Hernandez s/n (banda di Botica Korona)

Chaparral di Bubu Josephia, ku ta praktiká hortikultura na eskala chikitu. Pero su produktonan ta yega tòg den tienda.

Arie i Tessa Boerstra a kuminsá ku nan empresa Bo Tera na 2018 i ya tin produkshon grandi. Nan ta

usa awa di WEB pa produsí entre otro kònkòmber largu, spinazi, yerba bueno, promèntè, kousebant. Na tur nan ta produsí masoménos 8 diferente organismo i ta eksperimentá pa oumentá e variedat.

E diputado a papia hopi

amplio ku a pareha, a skucha nan eksperensia i tambe plannan. El a elogiá nan dedikashon.

Tjin-Asjoe spesialmente despues ku e pandemia di coronavírus a yega Boneiru a kuminsá ta pone hopi atenshon na empresario-

nan ku ta aktivo riba produkshon di alimento. E ke sa na ki porsentahe Boneiru por yega ku produkshon di su propio kuminda.

Arie Boerstra a asentuá ku ta solamente awa produsí pa WEB nan ta usa pa produsí berdura den e 'greenhouse'-nan di Bo Tera. Tabata un invershon

grandi pa kuminsá. E tata di Arie, kende tambe ta aktivo finansieramente riba e tereno aki, a yuda nan finansieramente ku un kapital inisial.

Mester trese dilanti ku kontrario na loke tin hende ta pensa, loke Bo Tera ta produsí ta eksklusivamente ku awa di WEB i no ta e awa prosésá di kloaka.



Dienst Uitvoering Onderwijs
Ministerie van Onderwijs, Cultuur en
Wetenschap

Problema ku paga debe di estudio bèk?

Bo tin problema ku paga bo debe di estudio bèk serka DUO a konsekuensia di e situashon di corona? Nos ke yudá bo i ta ofresé posibilidat pa baha bo montante mensual òf pa para e pagamentu bèk, temporalmente.

Baha montante mensual a base di bo entrada

Bo por pidi nos pa tene kuenta ku bo entrada ora di hasi kalkulashon di bo montante mensual. E ora ei bo ta paga bèk segun bo forsa. Nos ta analisá standart bo entrada (konhunto) di 2 aña pasá. Si bo entrada a baha na 2020, bo por pidi pa tene kuenta ku e entrada mas abou aki. Bo montante mensual por baha òf asta bira € 0,-.

Pidi un periodo liber di pago

Bahamentu di bo montante mensual no ta un solushon? E ora ei bo por para pagamentu bèk di bo debe di estudio temporalmente.

Bo ta hasi uso kaba di e opshonnan menshoná i tòg bo ta hañá bo ku problema? E ora ei tuma kontakto ku nos via antillen@duo.nl. Menshoná den bo e-mail bo 'burgerservicenummer', adrès i fecha di nasementu. Nos lo papia e ora ei tokante bo situashon i lo buska un solushon adekuá huntu ku e persona. .

Areglonan di pago

Bo tin un areglo di pago serka DUO i pa motibu di e medidanan di corona bo no por kumpli mas ku bo obligashon di pago? Tuma kontakto ku nos e ora ei via debiteurenbeheer@duo.nl. Esaki ta konta tambe si bo tin un retraso di pago i tin un sita pa un kombersashon personal ku un empleado di DUO.

WEB ta keda na Hato



E kompania di awa i elektrisidat di Boneiru, WEB N.V., ta keda situá na Hato. Pronto nan ta bai kuminsá ku konstrukshon di nan planta di awa, pa asina despues di hopi aña nan mes prosésá awa atrobe. Pa asentuá kisas su presensia den bario Hato, e dianan ku a pasa a laga fèrf nòmber dje kompania riba un di nan tankinan di awa.

Pa mas informashon, tira un bista riba duo.nl/antillen

Dushi tempu bieu



Broertje Janga, un di e polítikonan di mas grandi den historia di Boneiru, dilanti Passangrahan. (Kolekshon di foto Herbert Cesilia - FuHiKuBo)

Programanan di Bonaire.tv

Telbo kanal 70
Flamingo TV kanal 23
Djaluna 25 mei

12:00 Herensia:

Alejandro 'Bubu' Martinus parti 2

13:00 Aki Boneiru:

'Green House' di Stinapa

14:00 Herensia:

Marcel Caluto Janga i

Edna Margriet Janga-Sint Jago

15:00 BAPA:

Arletta van Beek

'Lechi i Keshi' 2009

16:30 Programa:

Apel di Oro

17:00 Aki Boneiru:

Classical Music Board

19:30 Puerto Latino:

Luis Zárraga

20:00 Herensia:

Clemente 'Elio' Flores i

Isaak Bernabela parti 1

21:00 Aki Boneiru:

Tibisy i Sharelly

22:00 Dokumental:


Mundu Nobo pa Tera Kor

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.



Hende di Boneiru

ROFIN



Un otro desendiente di Jan Hendrik Ellis, e promé Ellis na Boneiru, tabata Rofino Ellis, ku nòmber di kariño Rofin. E ta nasé dia 30 di yùli 1888 i su adrès tabata Rincon nr. 79, loke awendia ta Kaya Commerce den sentro di e barío. E rumannan di Rofin

tabata Jan Leopold Rietdijk Ellis, Petronella Ellis (kasá ku John Schermer – John Flamashi), Simon Ellis, Maria Petronella (kasá ku Rudolf Wilgenburg) i Maximo Ellis.


Rofin Ellis tabata kasá ku Adela Wout. Su ruman Simon tabata kasá ku un ruman di Adela, esta Carmen Wout. Nan tabata yunan di Ellie Wout, un persona importante di Rincon. Ellie tabata 'districtmeester'.

Rofin a yega di traha komo peon pa gobièrnu ganando fl.32,50 den dékada sinkuenta. No opstante ku no tabata trata aki di un posishon haltu den komunidad, tòg Rofin tabata profilá su mes si komo un persona outoritario, desendiente di hende blanku di orígen oropeo. E tabata ademas un persona masha pèrtinènt i ku hendenan tabata respetá.


Den kurá di kas di Rofin Ellis i su esposa sa tin matanan di trinitaria ku bunita flor. Pero no por a djis para na kurá kita flor. Mester a pidi nan pa nan duna bo outorisashon pa kita flor pa traha bukèt for di nan palunan di trinitaria. Nan no tabatin yu.

MONCHI & TONCHI

Un bon esposa ta manera korona riba kabes di e rei.



Awèl sí. Anto un mal esposa ta un koronavírùs riba kabes di rei.



KOLOFÓN

Editor Extra-Boneiru i Boneriano
Bonaire Communication Services N.V.
Kaya Irlanda# 12, Tel. 717-8482
E-mail: extrabon@gmail.com
Wèpsait: www.extraboneiru.com

Direktor-hefe di redakshon

Bòl Antoin
786-6818

e-mail:

b.antoine.extra@gmail.com

Ko-direktor

Shirley Martis

785-3824 / 796-3824

e-mail:

shirleymartis2001@hotmail.com

Redakshon

Papi Antoin

(redakshon final)

Selular 700-0145

Ludovico Nicolaas
786-7978

Ibi Piar (deporte)

786-0200

Reportero-Fotógrafa Rincon

Crusita Thielman

796-1236

Aviso

Davienuska Janga

avisobon@gmail.com

Layout

Davienuska Janga

Yair Hormechea

Reserva enorme di awa dushi den Lima

KRALENDIJK -- Tin un reserva enorme di awa dushi den e área di Lima. E grupo di eksploradó di mondi, Chantiwawa, djadumingu último a bai Pos Wayaká, ku ta indiká riba e mapa topográfiko di Kadaster, tambe riba un mapa di mas ku 100 aña pasá ku un ofisial militar yamá Werbata a traha. E pos aki tabata asina importante ku a marka su posishon topográfiko.

Ta konosí ku den área di Lima, for di Aeropuerto Flamingo bai sùit, tin diferente pos, hopi biaha ku nòmber ku ta referí na palunan ku tin den nan besindario. En-

tre otro posnan Watapana, Kalbas, Mangel i Wayaká.

Pos Kalbas di nan ta esun mas konosí, konsiderando ku den añanan sinkuenta a saka un pipa pa pòmp awa hiba e plantashi Aruba, tambe te asta e bario Antriol. Un awa di kalidat hopi bon, kasi dushi, ku hendenan di Antriol entre otro por a haña te den nan kas via ret di pipa.

Wayaká

Hopi mas pa sùit sinembargo tin un pos hopi mas importante. E ta keda sùit di Kaya Ir. Randolph Statius van Eps. Hende grandinan semper sa papia di dje,

pero e no ta fásil pa yega.

Djadumingu último sinembargo Grupo Chantiwawa, bou di guia di Bòl Antoin, a drenta mondi, dirigí pa bai e pos aki. A logra yega e pos tambe. A laga un liña bai den dje pa midi su profundidat. A yega na masomenos 7 meter, pero ta un pos hanchu, ku tin konekshon ku diferente otro pos i kueba den e área aki.

A purba e awa, ku a resultá di ta hopi dushi. A yena bòter ku e awa aki i otro posnan den besindario pa laga hasi tèst di laboratorio di su kalidat. Pero purbá e ta indiká kaba di ta

un awa di bon kalidat.

40 Aña pasá

Antoin masomenos 40 aña pasá a bai e pos aki kaba huntu ku diputado Julio Angela (LVV) i e hefe di Servisio di Distribushon di Awa e tempu ei, Cai Marsera, pa opservá e pos aki. Boswachter Errel Bomba di Tera Kòrà a hiba nan. Fotógrafo di gobièrnu e tempu ei Herbert Cesilia a saka un seri di foto ku ta den archivo di FuHiKuBo.

Spesialmente Cai Marsera e tempu ei a pensa pa

tene Pos Wayaká na bista pa usa su awa si un dia mester surgi un kalamidat, poniendo ku no tin awa di bebe na Boneiru.

Pos Wayaká ta situá na masha leu for di un área kaminda katibunan ku tabata traha den salina tabatin nan ranchonan di piedra, ku hende grandinan di Tera Kòrà tabata yama 'Rancho Negro'.

E grupo Chantiwawa a hasi uso di aparato pa marka e ruta pa Pos Wayaká, pa asina por yega einan mas fásil.



YUNAN PREFERÍ

Skritura: Salmo 147:10,11

"Señor ta hiba gustu den esnan ku ta tem'É, den esnan ku ta spera riba Su misericòrdia." v.11 (BS)

Ta bisá ku mayornan no tin yu preferí. Ademas, nan ta sinti nan mes ofendí si un hende tribi bisa ku nan tin sierto preferensia pa un yu. I esaki pasobra e 'imparsialidat' akí ta manera un sinónimo di hustisia, den nos manera di pensa. No tin nada mas hustu ku e echo ku yunan ta risibí amor i trato igual serka mayornan. Di akuerdo ku dikshonario, 'preferá' ta nifiká 'stima mas' òf 'pone dilanti'. Nos idioma ta asina riku ku nos por nombra masha hopi sinónimo: 'diferensia', 'distinguí', 'favoresé', 'privilegiá', etc. Tur esakinan tin un grado di diferensia ku ta kuadra ku e sentido ku no tin neutralidat. Pensa riba loke abo ta distinguí òf preferá. Bo ta hasi esaki ku un motibu. Mi tin tendensia di kere ku un ta preferá loke mas ta dun'é satisfakshon, loke ta agrad'é i loke ta gusta.

Mi gusta pensa den e imágen di Dios komo Tata. Un dia mi a kontra ku e dos versikulonan akí den Salmo 147. Mi a meditá riba nan i a yega na e konklushon ku Dios tin 'favorito'. E ora ei, papiando kunÉ, i pordoná mi e orguyo, mi a bis'É: "Tata, mi kier ta Bo yu muhé preferí." Pasobra mi a komprendé ku e amor inmenso di Dios ta inkluí nos tur, pero Su satisfakshon, Su delisia, Su preferensia ta pa esnan ku ta tem'É i ta spera Su misericòrdia. Nos tin un tarea difisil kada dia. Esaki no tin di hasi ku nos donnan, ni nos talentonan, ni sikiera ku nos ministerionan, ma ku e akтитud di nos kurason. Bo ke agradá Señor? Balorá i someté na Su boluntat, esaki ta nifiká ku bo tin temor p'E i ta spera riba Su misericòrdia.

Nancy Rodríguez Antivero, Uruguay

Tata, mi kier agradá Bo ku mi bida

Saká for di: Alimento Pa E Alma, un produkshon di Trans World Radio Bonaire.

Di parti di minister Slob (OCW)

66 mil dòler pa yuda medionan di komunikashon na islanan BES

KRALENDIJK – Minister pa Enseñansa, Kultura i Siensia, Arie Slob, ta pone 66 mil dòler disponibel pa yudansa na medionan di komunikashon na Hulanda Karibense ku pa motibu di e krisis di Corona ta haña nan mes den problema. Asina e mandatarario ta duna di konosé den kontesta na miembro nan di Tweede Kamer. Pa medionan di komunikashon na e pais-

nan Aruba, Kòrsou i Sint Maarten e no por hasi nada.

Tweede Kamer

Miembronan di Tweede Kamer a hasi diferente pregunta na e minister relashoná ku su plan pa yuda medionan di komunikashon finansieramente, partikularmente e medionan di komunikashon regional. Den e cuadro akí

miembronan di frakshon di ChristenUnie a pidi e minister pa duna atenshon tambe na medionan di komunikashon den e parti karibense di Reino Hulandes. Nan no por hasi un apelashon riba e fondo di emergensia ku gabinete a instituí, miéntras ku nan tambe ta keda fuertemente asotá pa e situashon aktua. E frakshon a puntra si e minister tabata dispuesto

pa studia tambe kiko ta posibel pa medionan di komunikashon den e parti Karibense di Reino i pa drenta den konsulta ku gobernantenan akibanda si ta nesario.

Di parti di miembronan di e frakshon di CDA nan tabata kier sa di e minister si e medionan di sosten por a nifiká algu tambe pa korantnan i emisora- i kanalnan di televishon públiko na Boneiru, Sint Eustatius i Saba. Nan tabata kier sa si a duna publisidat na esaki.

tokante e último desarojonan rondó di e krisis di Corona i ta, komo 'watchdog' periodístiko, krusial pa funshonamentu di demokrasia. P'esei mi a disidí di pone 66.000 dòler disponibel pa mantené kontinuidat di suministroo di informashon na Hulanda Karibense riba nivel", e minister a duna di konosé na miembronan di Tweede Kamer.

Ehekushon

Na Hulanda Karibense RCN, e sekshon di OCW Area Karibense, ta enkargá ku ehekushon di e medida di sosten. "Banda di esei e sekshon di OCW Área Karibense ta trahando riba un plan pa fortifiká e sektor di periodismo riba e tres islanan na Hulanda Karibense. Ya e promé kombersashonnan a tuma lugá kaba", minister Slob a trese dilanti.

Na Hulanda Karibense Empresanan, basta nan ta kumpli ku e stipulashonnan, por bin na remarke pa e medionan di sosten di gabinete pa Hulanda Karibense. E minister ta rekomendá pa tuma kontakto ku e unit di SZW di RCN pa mas informashon.

Pa Kòrsou, Aruba i Sint Maarten si e minister no por hasi nada. E paisnan akí mes ta responsabel pa duna sosten na empresanan, entre otro e sektor di medionan di komunikashon. Algun di korant ku tin koresponsalnan na Boneiru, Saba i Sint Eustatius tambe, lo risibí un kontribushon pa esakinan via di RCN.



Numbernan Importante | Sosten sosial pa famia

Riba dianan di trabou, durante orario di ofisina



Bo tin pregunta tokante vírus di corona na Boneiru?

rijksdienstcn.com/covid-19
0800-1351 (grátis)



Bo ke papia tokante di strès na kas òf tokante kon pa atendé ku yu?

Sentro pa Hubentut i Famia
701-5257



Bo ta preokupá pa seguridat di mucha?

JGCN
715-7201



Bo ke papia ku un trahadó di Tim di Bario?

Tim di Bario
717-1714



Bo famia mester di un pakete di kuminda? Of bo no por paga akohida pa mucha, WEB, hür (di kas), internèt mas?

yudami@bonairegov.com
0800-1351 (grátis)



Bo mester di ayudo ku lesa, skirbi òf yenamentu di papel?

Fundashon Forma
+599 785-7314 (yama òf WhatsApp)



Pa notifikashon agudo di violensia doméstiko, abusu di mucha òf otro situashon di emergensia.

YAMA 911
(semper alkansabel)



Bo ta víktima di kualke echo kastigabel pa lei i bo mester di sosten emoshonal?

Ofisina Yudansa
Pa Víktima
717-6181

Protehá bo mes i esnan rondó di bo

huntu **kontra** corona

èxtra
...number 1

www.extraboneiru.com

Nasementu

Pronto Nicha ta duna lus na nan promé yu, ku ta un baronsito, ku nan a duna e nòmber di Napoleon, despues kariñosamente a yam'é Napi. Mi a nase riba e fecha di 6 di yanüari 1953 riba un djamars 7'or di mainta na hòspital na Playa. E personanan ku a asistí e parto tabata dr. Franssen i sùr Bartola.

Dia 8 di yanüari mes mi a batisá den kapèl serka pastor Leeuwenberg. Padrinu tabata Boeboei Martis i madrina Evelyn Every ku despues a kasa bira van Daalen.

Mi ta bin haña despues 5 ruman mas: Leo, Winny, Magali, Corina i Ayo. Nos tabata drumi huntu abou riba kama di kabana den hadrei. Kas a kuminsá bira chikitu i pa di bon Smith ta bin haña chèns pa kumpra kas di su mayornan na Playa Pariba. Ku e mudansa di mi mayornan i mi rumannan, mi a keda, riba petishon di mi mama, serka mi welo i wela na Antriol i no a bai Playa Pariba.

Na skol di lushi

Na edat di 4 aña mi a kuminsá bai skol di lushi òf "bewaarschool" na Antriol mes, den kurá di kas di Janchi i Blanca. E skol tabata konsistí di dos klas chikitu. Mi tabata serka yùfrou Du i yùfrou Duchi. Algun kompañero di skol di lushi e tempu aya tabata Boni (Matapushi) Martis, Kin Wang, Eki di Pochi (Semeler), Rafael Damascus di Lita, Calís Coffie, Win Martha, Wilfrido di Chichi di Eva (Reina), Piet Cicilia, Harrison i Taco Conquet, Blou Cicilia i Sherman Beaumont di Martins Sapaté.

Asina mi a kuminsá konosé muchanan di barío di Antriol i Nort di Saliña. E tempu aya mi a konosé



NAPI SU STORIA

Pa: Napi Boekhoudt



Den e hòspital aki m'a mira lus pa promé biaha.

obispu Holterman i huntu ku otro muchanan nos a kana un biaha den un sorto di proseshon kuné den Nort di Saliña. Tabata t'ei tambe Janchi di Blanca i Juan Silberie.

Un di e yùfrounan di e skol aki, Yùfrou Duchi, a yega kontu ku muchanan den e parti nort di Antriol, alrededor di e misa di Coromoto, mester a bai 'bewaarschool' na Playa. Pastor Nooyen, ku tabata e promé pastor di Coromoto na 1955 tempu ku a inauguré e misa aki, tabatin duele di mira e muchanan mainta tempran pará dilanti misa ta warda konvoi pa hiba nan 'bewaarschool' na Playa.

Sùrnan a pidi Blanca pa hür un edifisio den kurá di nan kas pa skol. Esaki a sosodé tambe. Diferente yùfrou a para den e dos klasnan di kua e skol aki, Maria Goretti Kleutersschool', tabata konsistí. Aparte di yùfrou Duchi i yùfrou Du tabatin yùfrou Olivia Woods-

Felo di Weis akí tabata hunga yùfrou di skol, dunando lès na ami, Leo i algun mucha mas den e edifisio ku despues a bira tienda. Mi tabata un mucha hopi inteligente i na e edat akí ya kaba mi a siña serka Felo wak oloshi i kontu te 100.



Nicha ku su baronsito, promé yu, Napoleon.



Muchanan den mi klas na Maria Goretti Kleuterschool.




Proseshon di muchanan di 'bewaarschool' den Nort di Saliña huntu ku Obispu Holterman, kompañá pa Janchi Antoin i Juan Silberie.

Marchena.

Skol di Felo

Tempu ku mi tabatin 4 pa 6 aña un ihá di mi mama ku yama Felo, ku tabatin mas o ménos 14 aña, tabata hunga skol ku su muchanan. Mi mayornan a kumpra e tempu ei banki ku skolnan tabata remplasá.

Prevení fèrkout, grip i e vírùs di corona



Labá man

Labá bo man bon durante **30 sekònde** ku skuma i awa.



No mishi

No mishi ku **wowo, nanishi òf boka**. Via e lugánan akí bo ta pega ku e malesa.



Kubri

Tapa bo boka i nanishi ora bo ta **tosa òf nister** ku un lensu di papel òf e doblá di bo èlebog.



Distansia

Mantené un distansia di alomènos 1.5m di otro hende.

Kiko ta vírùs di corona nobo/COVID-19?

Tin un brote internashonal di COVID-19 (konosí tambe komo vírùs di corona nobo) na e momentunan akí. E vírùs por okashoná síntoma manera kentura, tosamentu i halamentu di rosea anshá. Den un kantidat di kaso limitá el a kondusí na infekshon mas serio, asta morto.

Kontakto:

Liña di informashon vírùs di corona

☎ 0800 1351 (grátis)

+599 715 9199 (pa yamada internashonal)



Esaki ta un mensahe di Departamento di Salubridat Públiko



Hasi petishon pa pakete di kuminda pa kas di famia den nesesidat?

yudami@bonairegov.com òf 0800-1351 (grátis)

Menshoná por favor: nòmber i fam,
number di telefòn i motivashon di petishon.

Protehá bo mes i esnan rondó di bo

huntu kontra corona

AS OF MAY 25TH, 2020

OPENING HOURS

Customer Service & Cashier

Monday - Friday:

08.00 to 10.00 for 60+

10.00 to 16.30

for all ages

Kla Store

Monday - Friday:

08.00 to 10.00 for 60+

10.00 to 12.00

13.30 to 16.30

for all ages

Helpdesk

Monday - Friday:

08.00 to 10.00 for 60+

10.00 to 17.00 for all ages

17.00 to 19.30 reachable by phone

Saturday:

09.00 to 12.30 for all ages



Peanuts Fresh Market & Cafe

is opzoek naar;

Customer Service Supervisor

- Direct leiding geven aan het customerservice-team
- Het uitvoeren van 'training on the job' aan collega's.
- Specifieke kennis in het prepareren van koffie is een pre.
- Gedegen kennis van de engelse taal is een vereiste.

Interesse? Stuur een email naar everybody@peanutsbonaire.com

èxtra

Grátis

BONERIANO®

WWW.
EXTRABONEIRU.COM

Djammers 26 mei 2020

.....ketu bai number unu!

MISTERIO A KEDA TRAS

Ta malkriá mamanan Kas di Kuido



Luna di mei ta luna di mama. Na Kas di Kuido, pa e motibu ei, ta malkriá mamanan, manera e fotonan ta indiká. E dianan aki tin diferente aktividat bunita na Kas di Kuido.

KARA BONERIANO



Gielbert 'Bito' Alberto ta yu di Martins Alberto i Delia Semeleer. Bito a traha mas ku 25 aña komo boluntario i ta koperá semper ku sentro di barío Nort'i Saliña. Tambe e ta hopi aktivo den e mundu di deporte, manera nos selekshon di futbòl.

Pronóstiko di tempu



Leve te parsialmente nublá i seku

Ta leve te parsialmente nublá i lo keda seku. E temperatura máksimo lo ta aproksimadamente 32°C, e temperatura mínimo mas o ménos 27°C. E bientu ost ta moderá te basta fuerte, 4-5 Bft.

Altura di ola: aproksimadamente 2.0 m (5-7 pia)

* Altura di ola válido pa laman grandi

Durante e temporada di orkan, KNMI ta vigilé minusiosamente e Oséano Atlántiko den koperashon ku e National Hurricane Center (NHC). E pronóstiko mas resién ta disponibel via <https://www.nhc.noaa.gov/gtwo.php?basin=atlc&fdays=5>

MISTERIO A KEDA TRAS

KRALENDIJK – Enoc Poulino Melaan, e hòmber ku tabata pèrdí den mondi pa nort di BOPEC siman pasá, a fayesé, pero lagando hopi pregunta atras. Su morto ta rondóna pa misterio. Kiko por a pasa? Djarason pa djaweps siman pasá e persona aki di 39 aña, por sierto un deportista hopi popular, a dispar-sé. Su morto a impaktá su famianan den Nort di Sa-liña.

Tripulantenan di un heli-kòpter embolbí den e akshon di búskeda a dskubrí Enoc Melaan drumí den mondi. Su kondishon no

tabata masha bon, pero tòg stabil. Pero despues a bin resultá ku tòg tabata mihó pa traslad'é pa Kòrsou pa atenshon médiko mas spesialisá. Pues e dòk-ternan ku tabata atend'é a mira tòg ku no tabata bon ku Enoc Melaan. Na Kòrsou el a bin fayesé.

Misterio

E forma ku Enoc Melaan a dispersé djarason atardi, miéntras ku e tabata huntu ku su tio Felipe, ta hopi straño, kasi ineksplikabel. Pa kolmo a dura 18 ora pa a hañ'é bèk riba un teritorio relativamente chikitu, pero

un tereno bruto.

Polis a papia ku Felipe Melaan pa mira tòg kon lo por akklará loke a sosodé. Te ainda sinembargo no tin niun indikashon di kiko por a pasa ku Enoc, un persona ku tabata muestra di bon kondishon di salú, asta un deportista.

Di mes riba media sosial e diskushonnan a start. Tin hende entre otro ta bisa ku ta un alma malu a bai kuné den e mondinan aki. I ku e lo a mira algu i spanta. Otro ta bisa ku ta simplemente el a kai òf haña un ataka serebral. Tur sinembargo ta spekulashon.



Ku onda pena nos ta partisipá fayesimentu di:

Luguén Crestian
ruman di nos kolega

Robert Sances

Gobièrnu di Boneiru ta ekstendé su kondolensia na famia di e defuntu.

Gezaghebber Edison Rijna
Sekretario Interino Gabriel van Arneman



Historia i storia

Di mes e pèrdèmentu di Enoc Melaan den mondi a keda konektá ku historia i storia, en todo kaso pasado. Historia di hendenan ku tambe a pèrdè den historia di Boneiru, sin ku nunca a haña nan bèk atrobe. Ademas storia di spiritu malu ku a bai ku nan.

Extra djasabra último a publiká un kapítulo interesante for di e buki 'Simia di Kultura' di Broertje Janga, den kua el a relatá

sitionan beako na unda hende sa pèrdè den besindario di Rincon.

Djasabra último e asunto di pèrdèmentu den mondi tabata tema sentral den e programa di historia i kultura Beku na e emisora 'Voz di Bonaire'. E reashonnan tabata asina hopi te asta ku a disidi pa djasabra awor sigui atendé e tópiko den e programa.

Kiko a pasa?

Pero e pregunta klave ku ta keda kologá den aire ta

kiko a sosodé ku Enoc Melaan? El a papia algu despues ku a lokalís'é? Si el a papia, kiko el a bisa? El a bisa kiko a sosodé?

Mientrastantu tin hopi spekulashon sí rondó di e kaso aki. Entre otro tokante sierto leshonnan ku e tabatin na su kurpa.

Di mes Exta no ta bai den tur e spekulashonnan rondó di e kaso di Enoc Melaan. Ta di sinta spera kiko lo bini afó di eventual mas investigashon den e kaso aki.

EZ-Air kara konosí na Statia



Avionnan di EZ-Air, kompania di aviashon boneriano, a bira un kara konosí na St. Eustatius. Desde ku coronavírus a hasi su entrada, EZ-Air ta efektuá diferente buelo pa e isla ei, ku huntu ku Saba i Boneiru, ta munisipio spesial di Hulanda. E buelo ta bai rápido i tin fasilidat sanitario na bordo. No ta eskluí posibilidadat ku den e 'normal nobo' EZ-Air lo por bai haña un lugá fiho den iterinario entre Boneiru i St. Eustatius.

Diálogo Sentral:

Prolongá pakete di emergensia te desèmber

KRALENDIJK – Diálogo Sentral di Boneiru huntu ku esun di Sint Eustatius pa medio di un karta a urgi e Grupo di Guia Hulanda Karibense pa prolongá e pakete di emergensia te fin di e aña akí.

Tambe nan a proponé pa adaptá e pakete aktual riba sierto partinan – siguiendo pasonan di Hulanda Oro-peo – i ampliá esaki. Por ehèmpel vários ministerio komo komplementashon di e medidanan general a primintí sosten finansiero na sektornan spesífiko manera kultura, deporte i ‘startups’. Ámbos Diálogo Sentral a supliká pa de-

klará esosten akí aplikabel tambe pa Hulanda Karibense.

Aparte di esei den e karta nan a hasi un kantidat grandi di sugerensia ku ta kontribuí na rekuperashon di ekonomia, por ehèmpel eliminá burokrasia na momentu di tratamentu di petishon di empresarionan pa un pèrmit di establecimiento i drechamentu di aksesibilidat i konekshonnan pagabel den region. Na mes momentu nan a boga pa introdukshon di medidanan ku ta dirigí kontra empresarionan di mala fe. Mas aleu nan a pone énfasis riba hisa e oferta di

edukashon na un nivel mas haltu, sea ta digitalmente òf nò.

Diálogo Sentral ta e plataforma di konsulta di doñonan di trabou, sindikatonan, Kámara di Kòmèrsio i gobièrnu lokal ku den su forma aktual a ranka sali na luna di novèmber 2018. Na luna di òktober 2019 a firma un deklarashon di koperashon ku sekretario di estado di Asuntunan Sosial i Empleo Tamara van Ark. Na kuminamentu di e aña aki a stipulá un kuadro di maneho komun (‘Un futuro brian-te’) pa e periodo 2020 – 2023.

Despues ku a surgi e brote di e krisis di corona a forma dos grupo di trabou. E promé ta wak si e medidanan di sosten ku a keda tumá ta efektivu i si eventualmente mester ahustá esakinan. E grupo di trabou akí a sòru pa e aporte pa e karta ku siman pasá a bai pa e Grupo di Guia Hulanda Karibense. E di dos grupo di trabou ta trahando riba un senario pa stimulá rekuperashon sosial i ekonómiko di Boneiru, asina ku por habrí frontera di nos isla atrobe.

Grupo di Guia Hulanda Karibense ta un órgano di konsulta den kua sekretarionan general i òf direk-

tornan general di e departamentunan konserní di Reino ta representá pa papia tokante temanan relevante ku ta regardá Hulanda Karibense i

trabou di e departamentunan. Presidente di e grupo di guia ta direktor general di Relashonnan den Reino i Henk Brons.

Atrobe aksidente ku skuter



Djaluna mainta tempran tabatin otro aksidente embolbiendo skuter. E biaha aki riba Kaya Korona pegá ku e stashon di gasolin di CUROIL na Mentor. No tabatin herido di gravedat. Un outo a dal den un skuter. Fotonan ta mustra imágenan na e sitio di aksidente.

NUBIA

*Manera ku ta den un teater mi ta sinta,
tur atardi bou dje pal'i tamarèin.
Pa mi por opservá e trabou sensashonal
di e artistanan ku yama nubia.
Paresido na nieve òf katuna
formando kontraste ku e shelu blou seleste.
Nan ta balia pa aki, zoya pa aya,
siguiendo bientu su komando i su guia.
Kada ratu nubianan ta ekshibí un paisahe,
un figura, un imágen diferente.
Patronchinan ku mi bista ta kapta,
ta yuda mi relahá i mas ainda inspirá.
Tin ta forma, kambia i sigui move,
sin duna mi ni tempu pa por desifrá.
Nan mensahe òf kisas nan atvertensia,
pa mi ta alertá òf sea bon prepará.
Tur atardi, ora solo yama te mañan,
pa e disparsé den Saliña di Martin.
E espasio riba horizonte,
ta ser transformá den un paleta gigantesko
di nubianan shinishi,
interkambiá ku kolónan hel, oraño, tambe karmin.
Otro ekshibishon di un kuadro nobo
ku figura i siluetanan pintoresko.
Nubianan, boso sigui forma dia aden i dia afó,
tur atardi un otro paisahe.
Ku mas silueta i mas imagen,
pero yuda mi pa komprondé boso mensahe.
Komo admirador di boso,
bou di pal'i tamarein
sin falta mi ke ta tur atardi.
Pa mi sigui presensia otro gran obra di arte,
loke boso so por produsí.*

Outor: Ubaldo Anthony.....5 desèmber 2003.



Religion na Boneiru 9



Sùrnan di Roosendaal

Iglesia Katóliko Romano a trese Boneiru tambe Sùrnan di Roosendaal pa traha den enseñansa. Esaki tabata meimei di siglo 19. Despues e mesun kongregashon aki di sùr, masoméno 70 aña despues, ta bai traha tambe den sektor di kuido, manehando hòspital, mas despues kas di kuido pa hende grandi.

Trabou di religiosonan for di Hulanda i esunnan ku a nase riba e islanan durante di hopi siglo a yuda basha e fundeshi pa desaroyo dje islanan. Esaki nan a hasi ku nan evangelisashon, enseñansa, formashon, guia sosial, kuido, kultura i naturalmente un amor inkondishonal pa un pueblo henter.

Den e trabounan aki pueblo di Boneiru a bria komo ku kasi un 30 mucha muhé boneriano ku a drenta konbento durante di di kaso dos siglo pa sirbi Dios i nan pueblo.

Kasi tur loko Boneiru tin riba tereno di formashon, kuido sosial i salubridat a kuminsá ku e mishon di religiosonan katóliko hulandes. Ku ménos rekursu i medio finansiero, ku tin aworakí na disposishon, nan a logra di pone un base pa pueblo por sigui desaroyá su mes.

Enseñansa

Dia 18 di òktober 1855 Gobièrnu a duna pèrmit na Iglesia Katóliko pa habri e promé skol partikular bou di responsabilidat di Sùrnan di Roosendaal na Deentera-Antriol. E skol a habri, dia 20 di yanüari 1856, ku e promé dos sùrnan ku a yega Boneiru: sùr Ignatia i sùr Clara. E interes i entusiasmo tabata enorme: A inskribí mas ku 100 mucha pa haña lès. Pero, no ta solamente muchanan liber so tabata haña lès pòrnada, tambe yunan di katibu.

Despues, na 1914 Pastor Hendriks di Kralendijk a tuma e iniciativa pa lanta



Yegada di e promé tres frateran na Boneiru.

un skol di frater di manera ku na 1915 e muchanan hòmer por a bai di skol di sùr pa e skol di frater nobo aki.

Kuido

Añanan despues Mgr. Vuylsteke a kumpra un kas grandi ku basta tereno na Boneiru i dia 5 di febrüari 1922 e superiornan di Sùrnan di Roosendaal, Mère Alexia i Luciana, a biaha pa Boneiru ku dos religioso enfermera pa organisá kuido médiko pa e pueblo di Boneiru. Pronto, despues di algun preparashon, e kas a ser bendishoná pa obispu dia 12 di febrüari 1922 i el a haña e nòmber Hospital San Francisco. Na 1924 obispu a pone e hospital den man di Sùrnan di Roosendaal.

Pues, e inisiativanan aki ta demostrá ku Sùrnan di Roosendaal, banda di un evangelisashon intensivo ku e tiki rekursu ku tabata na nan disposishon e tempu ei, a enbolbí nan mes tambe den trabounan di formashon i di kuido sosial i médiko pa pueblo di Boneiru. Formashon i kuido pa un i tur; sin distinsion. Ta den e cuadro aki di un amor ardiente i dedikashon kasi sin límite na próhimo, por komprondé e karisma i trabounan impresonante di tur e sùrnan ku a biba i traha na Boneiru.

Tera fértil

Boneiru a resultá un tera religioso; hopi fértil pa vokashon. Un tera krioyo ku a produsí bastante religioso. Pader Hein Nooijen, e gran outor, ta konta di esei den su buki 'Cornelis Marten. Cien anja di Bonaire': "Boneiru ta lihé pa duna sùr na konbentu." I e ta splika kon promé Maria Geertruida (ku ta di Sùrnan di Breda ku e nòmber Sur Maria Elisabeth) un otro mucha muhé a drenta konbentu, esta Eleuteria de Palm. El a bira sùr di Roosendaal e mes aña ku sùrnan di Roosendaal a bini Boneiru. El a nase dia 18 di aprel 1836. Su mama

tabata yama Feliciano di Emerenciana. Feliciano tabata katibu di rei meskos ku su yu Eleuteria. Pero, pastor Basilio a kumpré liber i a tum'é na su kas. Despues el a drenta konbentu serka Sùrnan di Roosendaal komo Sùr Marie Lucie.

Algun otro nòmber di sùrnan di Boneiru ku ta topa den literatura ta por ehèmpel: Sùr Marie Bernadine, Sùr Pascalia, Sùr Egidia, Sùr Humiliana, Sùr Agnes, Sùrnan Estelle, Emelina i Ines Nicolaas, Sùr Conrada, Sùr Grada Visser, Sùr Felicitas Statia, Sùr Theopista Booi, Sùr Gerarda Goedgedrag, Sùr Elina Herrera, Sùr Denise Herrera, Sùr Clementa Hart, Sùr Theonille Marchena, Sùr Hedwig Paula, Sùr Serva Boezem, Sùr Aniceta de Palm, Sùr Cantalisia Pourier, Sùr Dominica Bernabela, Sùr Virginia Bernabela, Sùr Crispina Koeks, Sùr Pacifica Wanga, Sùr Magda Crestian, Sùr Emilia Pourier, Sùr Juliette Cicilia i Sùr Swinda Seraus. I asina tin mas.

Patrimonio spiritual

Sùrnan di Roosendaal a proba ku nan patrimonio spiritual, nan herensia, ta konsistí di:

1. E spiritu i propósito di nan fundador; e karisma di Sùr Marie Joseph;
2. E tradishon di e instituto; e manera ku nan a biba komo komunidad bondadoso i generoso;
3. Un amor inkondishonal pa pueblo di Boneiru

Dr. Valdemar Marcha a bisa den un diskurso na òktober 2019, na inaugurashon di e monumento na Rotonde di Sùrnan di Roosendaal: "Sùrnan lokal komo miembro di e komunidad di Sùrnan di Roosendaal i yunan stimá di pueblo di Boneiru a konkistá nos tur su kurason. No por otro tampoko, pasobra nan a proba di ta: Un ehèmpel pa nos modelá nos bida; Maestranan ku ta siña nos kon pa biba segun Lei di Dios; Mediadornan ku ta trese pas; Rumannan pa otro."

Yegada di frateran

Banda di sùr, Iglesia Katóliko a sòru pa trese Boneiru tambe e kongregashon Frateran di Tilburg. E promé tres frateran ku a bin traha na Boneiru tabata Maxentius Bayens, ku a yega Boneiru dia 17 di desèmber 1914, sigui



Riba e foto aki por mira pará Yùfrou Lola, Sùr Amica, Sùr Caritas i sintá e yùfrounan Cristina Beaumont-van Arnevan, Petronilia, Maria i Juana Anthony. Personal di St. Ludovisschool.

dia 29 di desèmber di e mesun aña pa frateran Majella Kramps i Conradus de Jong. Ku nan yegada a kuminsá un kapitulo nobo den historia di Iglesia Katóliko na Boneiru.

Anke ku Monseñor Niewindt for di meimei di siglo 19 a boga pa haña hende pa atendé ku skolnan spesial pa mucha hòmer na Boneiru – te na e momentu ei tur mucha katóliko tabata sinta huntu ku mucha muhé den skol di sùr — , a dura te na 1911 pa a tuma akshonnan konkreto pa trese frater e isla aki. E frateran aki tabata trahando pues na Kòrsou for di 1886 kaba.

Aparte di skol di sùr, tabatin un skol di gobièrnu na Boneiru, konosí komo 'Landsschool', situá patras di Kèrki Protestant na Playa. Tambe tabatin un tempu na Boneiru un skol partikular bou di direkshon di e maestro di katisashi M.L. Stadius van Eps. E skol aki a eksistí di 1877 pa 1882.

Loke por a ripará den e tempu ku tabatin únkamante skol di sùr na Boneiru pa muchanan salí for di un kas katóliko, ta e echo ku e mucha hòmeran no tabata sinti nan mes kómomo na skol di sùr, na unda nan mester a haña lès sintá den klas huntu ku mucha muhé. Despues di e promé aña na skol di sùr e mucha hòmer aki tabata kita pa bai skol públiko.

Den práktika tabata parse komo si fuera e skol públiko aki, ku un hende hòmer komo maestro (meester), tabata é skol pa mucha hòmer na Boneiru, miéntras ku skol di sùr tabata pa mucha muhé.

Den transkurso di añanan, mas i mas mucha hòmer a kuminsá kita for di for di skolnan di Playa. Pa e mucha hòmeran aki skol di sùr no tabata nifiká mas ku un 'bewaarschool'. Ademas e asistensia di mucha hòmeran tabata laga hopi di deseá.



E tóipiko di hendenan ku ta pèrdè i/òf blèndu den mondi a resultá di ta hopi interesante. E tóipiko aki a bini na diskushon durante e insidente ku Enoc Melaan, kende a resultá pèrdí den mondi nort di BOPEC, hasiendo uso di 'drone', helikópter i basta hende riba pia pa buska. A haña Enoc Melaan na bida, pero lamentablemente el a fayesé despues.

Djasabra último nos a skohe pa papia riba e tóipiko aki den e programa Beku na 'Voz di Bonaire', pero mirá for di un perspektiva históriko, esta kasonan di desaparishon di hende den pasado na Boneiru. E reakshonnan ku a drenta via telefòn a muestra kla ku ta un tóipiko hopi gustá, spesialmente e misteriosidat ku ta rondoná e kasonan aki. Loke ta resaltá ta e aspekto di spiritu i alma malu ku lo ta pone hende brua den mondi/ i pèrdè. Djasabra awor nos ta sigui atendé e tóipiko aki. Nos ta fèrwagt ku boso lo yama tambe pa nos por haña mas storia ku nos por dokumentá.

M'a pone tambe algun di e storianan aki riba facebook. E reakshonnan, ku komentarioan interesante, tabata basta. Especialmente e parti ku nos a publiká den Extra djasabra, saká for di un kapitùlo di e buki 'Simia di Kultura' di Broertje Janga. Ta un buki ku m'a yuda Broertje saka. Mi a taip su manuskrito den kòmputer. Na Extra a traha e 'layout'. Un buki interesante.

Skirbiendo riba e tóipiko aki, mi no por keda sin kòrda riba bonerianonan ku a disparsé sin nunka a haña nan bèk. Den Beku djasabra nos a topa por ehèmpel e desaparishon di Avelino Winklaar. E tabata forma parti di un plug ku tabata hasiendo sierto trabounan na Kaminda Turístiko. El a bai un ratu for di e grupo i nunka mas a mir'é. Te awe.

Tabatin mas kaso similar, tin di nan ku holó di un akto kriminal kologá na nan. Por ehèmpel e kaso di un haitiano ku a disparsé na Fontein. A buska, pero nunka a haña un pista di e persona aki. Mi ta kòrda ku mi a bai den e área ei huntu ku Walter Coffie. Nos a rondia oranan largu riba e seru di Fontein, pero niun spor di e haitiano.



EDITORIAL

Zonido positivo fo'i skina sindikal

Tempu a kambia. Si den pasado sindikatonan tabata riba un gira kontinuo pa ataká, último tempu aki, sigur for di e skina di USIBO, ku ta e union di sindikatonan boneriano, por skucha zonidonan positivo ta sali. E tono a kambia i sindikalismo ta etalandu awor mas un aserkamentu positivo ku tantu sektor empresarial komo gubernamental, kaminda e trahadó ta sentral.

Kada kos tin su tempu. Kisas 20, 30, 40 i 50 aña pasá e 'kos' tabata pa sindikalistanan bai prensa pa, ku tono fuerte i duru, ataká doñonan di trabou, menasa ku akshon i wèlga i tene akshon i wèlga tambe pa kualké chin-chan kos.

E 'modus operandi' aki no ta funshoná mas. Atakenan verbal i vokal, manera nan tabata sosodé ántes, no tin sentido mas. Nos ta biba den un tempu ku diálogo i negosiashon, usando sano huisio. Ta e hèrmèntnan mas primordial pa sali for di impase i konflikto laboral.

Nos ta lesando ku atenshon e komunikadonan ku USIBO ta sakando regularmente. E forma kon nan ta aserká por ehèmpel e situashon laboral debí na coronavírüs, e situashon laboral na BOPEC i otro 'issue-nan ku ta biba últimamente den sektor laboral di Boneiru, ta di aploudí.

Nada di atake, sino mas un aserkamentu di ku "nos tambe ke yuda' òf "nos tambe ke aportá ku nos granito". Asina mester ta, pasobra ta nos tur huntu, sektor

gubernamental, sektor empresarial i sindikal, mester pone kabes huntu pa sali na interes di e trahadó.

Den sindikalismo era moderno nos ta kere ku delaster hende mester realisá ku si no tin empresa, si no tin sektor públiko (gobièrnu), no tin trahadó. Asina simpel e asunto ta.

Trahadónan tambe mester komprondé i realisá ku nan mester tin un aktitut positivo. Tuma trabou na serio, trata na logra produktividat mas haltu posibel, bringa huntu ku bo doño di trabou pa bai dilanti, realisando ku si un empresa bai dilanti, e trahadó tambe ta bai dilanti. I mas ku tur kos: futuro di bo kupo di trabou tambe ta garantisá.

Nos ta rekomendá USIBO pa sigui riba e trayekto aki. Bon mirá den e tempu aktual no tin otro trayekto tampoko. Muestra tambe trahadónan, sea miembro di sindikato òf trahadónan en general, ku nan mes komportá i nan mester produsí. Ta dos palabra mágiko. I nan mester ta loyal na doño di trabou.

Di otro banda sektor empresarial tambe mester aktua korekto i hustu ku trahadó. Asina tambe sektor gubernamental. Meskos ku boso ta fèrwagt di trahadó pa komportá i produsí, sòru tambe pa duna nan un trato i rekompensa hustu. Tur esaki mester bai bira parti di loke nan ta yama últimamente "e normal nobo".

USIBO ta buskando alternativa

Mester ta pro-aktivo pa enfrentá tempu difísil

KRALENDIJK -- USIBO, e órgano di sindikatonan boneriano, internamente ta en buska di alternativa pa e temporada difísil ku ta bai enkontrá relashoná ku e efektonan di Covid-19. "Nos semper a bisa ku nos no por drumi warda, pero nos mester ta pro-aktivo sabiendo kiko ta wardando nos."

Di akuerdo ku USIBO den un komunikado di prensa, ta un echo ku situashon ekonómiko di Boneiru lo bai dura basta promé ku e rekuperá i bai drai bèk na un nivel ku e tabatin promé ku 13 di mart di e aña aki.

USIBO den representashon di e klase trahadó, kier duna su granito na bini ku posibel solushon ku mester bai garantisá kupo di trabou pa gran parti ku ta kai den e sektor di hóreka en partikular, ku ta e sektor ku mas ta mira ku lo bai pasa den tempu hopi difísil relashoná ku e Covid-19. Opviamente esaki ta konta pa tur e sektornan

ku nan eksistensia pa gran parti ta dependé di e industria di turismo.

Loke mester bai pasa mas pronto posibel ta pa por yega na plannan konkreto pa sa den ki direkshon nos kier hiba nos isla den e tempunan difísil ku tin na horizonte. E ehersisionan ku mester bai hasi ta rekerí un kontribushon di tur partido envolví, esta tur nanishi mester ta den mesun direkshon.

USIBO ta kere ku awor ku Hulanda a bai di akuerdo pa prolongá ku tres luna mas e 80% di salarionan, laga usa e tempu aki pa krea mas tantu kupon di trabou pa esnan ku lo por bai kai afó, pero bou di kondishon ku na momento ku situashon normalisá nan ta esnan promé

yamá pa regresá nan puesto di trabou.

"Ban usa e tempu aki pa laga e trahadónan ku ta dispuesto na siña un fishi nobo haña e oportunitat pa hasi esaki. Ban usa e tres luna nan aki pa laga e

trahadó bai henter siman futuro fuente di empleo", kuater (4) ora òf mas na su USIBO ta trese dilanti.

PASENSHI

Skritura: Santiago 1:2-4

"sabiendo ku e prueba di boso fe ta produsí pèrseveransia. I laga pèrseveransia tin su resultado perfekto, pa boso por ta perfekto i kompleto, sin falta di nada." v.3,4 (BS)

Na hopi okashon den bida, nos ta pidi Dios pa pasenshi. Pasenshi pa soportá diferente sirkunstansianan ku ta afektá nos bida diario. Tambe nos ta pidi pasenshi pa atendé ku sierto personanan. E bèrdat ta, ku pasenshi ta un birtut masha deseabel pa tur hende. Tin ku ta kere ku bo ta nase kuné; otro ta konsider'é komo algu inalkansabel; i tin otronan ta pensa ku bo por optené esaki fásilmente den un tempu kòrtiku, sin hasi masha esfuerso. Sin embargo esaki no ta asina, pasenshi no ta un don ku bo ta nase kuné, ni tampoko ta algu ku bo ta optené fásilmente den tempu kòrtiku, pero e ta alkansabel si. Bo ta alkansá esaki ora ku bo pasa den hopi kontratempu, aflikshon i prueba, i sigur no fásilmente ni den tempu kòrtiku, sino e no ta pasenshi. Pasenshi ta e kapasidat pa soportá ku konformidat, kalamidat, fatiga, insulto, etc. Tur e difikultatnan menshoná aki, segun Beibel, ta nan ta e mesun antesesornan di pasenshi. P'esei, ya komo ta asina, tur e difikultatnan akí ta presentá komo un sorto di prueba ku Dios ta permití Su yunan pasa den, pa nan desaroyá e birtut tan anhelá akí. I miéntras nos ta pasa den e difikultatnan, nan ta sirbi pa perfekshoná

i madurá nos. Awèl, laga nos regosihá ora pruebanan presentá, no mirando e situashon aktual, ma pa e bon resultado ku nan lo trese kuné.

Hernán Díaz Castro, Venezuela No hui pa difikultat, pasobra nan no tei pa kibra nos, ma pa benefisiá nos

Saká for di: Alimento Pa E Alma, un produkshon di Trans World Radio Bonaire.

USIBO den mensahe kla:

Ora sero ta yegando pa BOPEC

KRALENDIJK -- E plataforma sindikal di Boneiru, USIBO, i sigur e dos sindikatonan ku ta representá e trahadónan na BOPEC, esta BPWU i FEDEBON, ta hopi preokupá. A drenta último siman di mei i aki 5 pa 6 siman lo ta fin di yüni, ku ta e fecha ku e lisensia di OFAS lo terminá. Esaki ta nifiká ku ora sero ta yegando tambe pa BOPEC.

USIBO a komprondé ku e kantidat di barí di kombustibel ku CUROIL tabata kumpra serka BOPEC i bende ku Contour Global a kaba i ku ya pa basta siman e plan 'B' di gezaghèber, esta pa pasa pa 'light fuel' ta den ehekushon.

Ta en espera tambe pa pronto bai hinka den uzo un parke di tanki na Aeropuerto Flamingo pa por bai risibí atrobe e 'heavy

fuel' i transportá esaki ku trùknan pa Contour Global.

E situashon aki ta pone ku e fondonan ku mester bai riba e kuenta speshal no ta tuma lugá mas. Manera ta konosí, e fondonan aki tabata destiná parsialmente pa paga salario di e trahadónan i parsialmente pa invertí den drecha e tankinan.

USIBO ta opservá: "Kiko lo bai pasa despues di 30 di

yüni ku e fondonan ku lo por tin ainda riba e kuenta no ta konosí. I ta netamente esei ta e problema serio ku ta bai konfrontá. Si mes tin fondo ainda riba e kuenta, pero basá riba e echo ku e lisensia a kaba, ta di unda lo bai paga e salarionan, ya ku PDVSA no por manda fondo debí na e blokeo ku Merka a imponé."

Den e siman aki USIBO

lo hasi máksimo esfuerso pa yega serka gobièrnu di Boneiru i via nan gobièrnu di Hulanda pa haña sa ki posishon nan ta tuma den e situashon aki. E impakto sosial, finansiero i ekonómiko, pero tambe di medio-ambiente, ta obligá e dos gobièrnunan pa tuma posishon opinion di USIBO. "Nos ta ya pa tres aña den e situashon insigur aki."

Ta malkriá mamanan Kas di Kuido



Luna di mei ta luna di mama. Na Kas di Kuido, pa e motibu ei, ta malkriá mamanan, manera e fotonan ta indiká. E dianan aki tin diferente aktividat bunita na Kas di Kuido. Extra, manera semper, ta trese esakinan den publisidat den koperashon ku Josefina Trinidad-Piar.



Hasi petishon pa pakete di kuminda pa kas di famia den nesesidat?

yudami@bonairegov.com òf 0800-1351 (grátis)

Menshoná por favor: nòmber i fam,
number di telefòn i motivashon di petishon.

Protehá bo mes i esnan rondó di bo

huntu kontra corona

USIBO kontentu ku alargashon medidanan di emergensia

Usa e tempu pa prepará pa ora kuminsá habri Boneiru

KRALENDIJK -- Union Sindikatonan Boneriano (USIBO) a tuma nota ku gobièrnu hulandes a disidí di alargá e medidanan di emergensia ku 3 luna mas. Nos no sa si ainda bou di kua kondishonnan esaki lo tuma lugá. Pues te ku 13 di yüni awor trahadónan lo por sigui risibí 80% di nan salario, dado kaso nan no tin trabou pa motibu di e krísis di corona. USIBO ta

gradisidu pa e alargamentu aki, pero na mes momento USIBO kier hasi un yamada na tur sektor pa nos no bai drumi kere ku e alargamentu aki lo keda pa semper. USIBO ta di opinion ku mester usa e temporada aki, kaminda trahadónan ta risibí un ayudo, pa prepará pa ora kuminsá habri Boneiru.

"Nos ta kontentu ku en partikular hotèl Flamingo,

Delphins Hotel, Habitat i Plaza, tur kuater miembronan di BONHATA, ta usando e tempu aki pa trein nan personal. SZW ta duna kompanianan e fleksibilidat pa por trein trahadó pa por kumpli ku tur e protokòlnan nobo", USIBO ta mensioná den un komunikado di prensa.

Tambe USIBO a tuma

nota ku te ku 13 di yüni empresanan lo por hasi uzo di trahadónan. Nos sa ku tin hopi trabou ku por hasi, manera trabounan di mantenshon, di limpieza.

USIBO: "Lo ta bon pa organisá e plataforma kon ta bai mantené e distansia sosial ora kuminsá habri atrobe. USIBO a komprondé

ku e trahadónan ku keda yamá lo traha máksimal 32 ora pa siman i lo risibí 80% di nan salario ku nan tabata risibí kaba. USIBO ta spera ku trahadónan lo duna nan koperashon pa asina nan mantené nan mes ku e bon kustumber di traha i alabes risibí treinenan den nan trabou."

Tim Muller ta hala tras

KRALENDIJK -- Tim Muller kende lo a bai traha komo Sekretario di entidat públiko di Boneiru, a informá Kolegio Ehekutivo ku e no ta asumí e enkargo mas.

E motibu di su desishon ta un kombinashon di fak-

tor: e situashon vulnerabel ku Saba a kai aden debí na krísis di corona i konsiderashonnan personal.

A yega na e desishon den bon konsulta entre representantenan di ambos Kolegio Ehekutivo. Kolegio Ehekutivo di Boneiru tabata kontentu ku binida di Tim Muller, pero tin kompreshon pa su eskoho en bista di e sirkunstansianan partikular.

Ta inisiá mas pronto posibel e prosedura pa reklutá kandidato pa e funshon di Sekretario di entidat públiko Boneiru.



J&J Electric & Construction B.V.

ta buska
1 Metsla
2 Electro Monteur
Pa mas informashon yama na telefon
788-7339

Señor ta mi wardadó, lo ki no tin falta di nada -Salmo 23:1-

Ku honda pena, ta partisipá morto repentino di nos kerido

Luguén Gregory
Alexander Crestian

mihó konosi komo Oe
òf DJ Scorpion
*29-08-1979 120-05-2020

Na nòmber di **su esposa:**
Celine Crestian-Rosaria

Rumannan:

Robert Sances, esposa i yunan
Dorothy van den Heuvel, esposo i yunan
Nelsen Crestian, esposa i yunan
Charlon Crestian, esposa i yunan
Giovanny Mercera i yunan
Edgar Janga, esposa i yunan

Suegro i suegra: Luis i Frisia Rosaria-Emerenciana

Tanta i tionan, prima- i primunan, kuñá i suá, madrina i padrino Kenneth Vinck, amigu- i amiganan, bisña-, i konosinan, koleganan di trabou, koleganan di radio i D.J.

Famia: Crestian, Melaan, Sances, van den Heuvel, Rosaria, Emerenciana, Vinck, Lugo, Curiel, Velez, Sint Jago, Wijngaarde, Mercera, Janga, Ridderstaat, Pop, Heinze, Molina, Sarmaart, van den Assen, Anthony, Marchen, Domacassé, Bernabela, Balentien, Verherist, Reyes-Sanchez, Rooi, Manuela, Boezem, Johannes, Sintjacob, Gonzalez, demas famia na Aruba, Kòrsou i Hulanda

Si den nos tristesa nos por a lubidá nòmber di un famia, nos ta pidi nos diskulpa pa ku esaki.

Akto di entierro ta tuma lugá djaweps 28 di mei. Ta kuminsá risibi bishita di kondolensia di 1'or pa 3'or na Misa La Birgen di Coromoto, ta sali 4'or pa santana Katóliko na Playa.

Famia ta pidi ku por asisti den trahe alegre.

Den kuadro di desaroyonan rondó di COVID-19 tin ahuste nesesario segun reglanan konosi i stipulá pa EBT.

Despues di entierro NO por risibi bishita di kondolensia na kas.



AS OF MAY 25TH, 2020

OPENING HOURS

Customer Service & Cashier	Kla Store
Monday - Friday: 08.00 to 10.00 for 60+ 10.00 to 16.30 for all ages	Monday - Friday: 08.00 to 10.00 for 60+ 10.00 to 12.00 13.30 to 16.30 for all ages
Helpdesk	
Monday - Friday: 08.00 to 10.00 for 60+ 10.00 to 17.00 for all ages 17.00 to 19.30 reachable by phone	
Saturday: 09.00 to 12.30 for all ages	

TELBO logo and Kla mobile logo at the bottom.

Dushi tempu bieu



establesé den e edifisio aki. (Kolekshon di foto Herbert Cesilia - FuHiKuBo)

Programanan di Bonaire.tv

Telbo kanal 70
Flamingo TV kanal 23
Djarsars 26 mei

12:00 Herensia:

Olinda Rasmijn

13:00 Dokumental:

Mr. Bonaire Hugo Gerharts

14:00 Herensia:

Pancratio Benito 'Pancho' Cicilia

15:00 BAPA:

Streefkerk 'Planta Palu'-Eric van Onna-Boutismo Di Popchi

16:00 Herensia:

Alejandro 'Bubu' Martinus parti 2

17:00 Aki Boneiru:

'Green House' di Stinapa

18:00 Herensia:

Marcel Caluto Janga i Edna Margriet Janga-Sint Jago

19:00 BAPA:

Arletta van Beek 'Lechi i Keshi' 2009

20:30 Programa:

Apel di Oro

21:00 Aki Boneiru:

Classical Music Board

22:30 Puerto Latino:

Luis Zárraga

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.



Hende di Boneiru

WEIMAN



Anke e persona aki tabata konosí den Rincon komo Weiman, su fam no tabata Weiman. Weiman ta bini di su promé nòmber, ku tabata Wijnand. E tabata yama Wijnand Richard Janga i a nase na Rincon dia 2 di desèmber 1909. E tabata kasá ku

Sebelina Romada Albertus. Weiman, pa loko ta trata su trabou, tabata un hòmer di mil kampaña. Entre otro e tabata nabegante den e tempu ku e tabata mas yòn.

Despues ku el a stòp di bai laman, Weiman a hasi vários trabou. Banda di nabegante, e tabata notá tambe den registro di trabou di gobièrnu komo fèrfdó, peon i operadó di betònmolen. E trabou aki tabata konosí komo 'molenaar'.

Weiman sa gusta bai piska na baranka na laman di nort. Tambe e sa gusta bai su kunuku, situá pariba di e anterior plantashi Onima. Ei e tabatin su kabritunan i ademas tabata planta kunuku den temporada di yobida. E kaminda di asfalt bieu di Rincon tabata pasa te dilanti su kunuku.

For di e matrimonio entre Weiman i su esposa a nase vários yu. Esun mayó ta Norma Teresita (1937). Por mensioná ademas Aquiles Julian (1941), Andresito Aloysio (1942), Urbana Catharina (1945), Richard Eulalio (1949), Rudolf Luciano (1952) i Harrison Fransisco (1954).


Tantu Weiman komo su esposa a alkansá edat haltu. Asta nan a logra selebrá nan 60 aña di bida matrimonial huntu, loko hopi hende no sa logra fásil. E famia aki a biba na entrada di Rincon, sùit di kaminda, enfrente di e snèkbar chines konosí komo Asan.

MONCHI & TONCHI

Awor a kuminsá papia di 'coronasmart'. Ki bo ta pensa?



Awèl sí. Mi ta kere miho papia di 'coronapoverty'.



KOLOFÓN

Editor Extra-Boneiru i Boneriano
Bonaire Communication Services N.V.
Kaya Irlanda# 12, Tel. 717-8482
E-mail: extrabon@gmail.com
Wèpsait: www.extraboneiru.com

Direktor-hefe di redakshon

Bòl Antoin
786-6818

e-mail:

b.antoine.extra@gmail.com

Ko-direktor

Shirley Martis
785-3824 / 796-3824

e-mail:

shirleymartis2001@hotmail.com

Redakshon

Papi Antoin
(redakshon final)
Selular 700-0145

Ludovico Nicolaas
786-7978

Ibi Piar (deporte)
786-0200

Reportero-Fotógrafo Rincon

Crusita Thielman
796-1236

Aviso

Davienuska Janga
avisobon@gmail.com

Layout

Davienuska Janga
Yair Hormechea

Di shete Djadumingu di Pasku di Resurekshon

Promé Lektura : *Echonan 1, 12-14*
Salmo : *Salmo 27, 1. 4. 7-8*
Di dos Lektura : *1Pedro 4. 13-16*
Evangelio : *Huan 17, 1-11*

Na un okashon un mucha hòmber a risibí di su tata un bals. Su papa a bisé: “Kiko e bon mucha ta bisa ora ku e risibí un regalo?” E mucha hòmber a kontestá: “Mi ke un bals mas”. E aktitut aki ta komprendibel ora ta trata di mucha, pero ta lamentabel entre kristiannan adulto ku ta limitá orashon na pidimentu, ora ku den realidat orashon no ta prinsipalmente pidi i muchu ménos úníkamente pidi. Resa ta, di ta ku Dios i na promé lugá, alabá Dios,

yam’ é danki, pidié pordon i pidié grasianan nobo. Esaki ta e kuater finnan di tur orashon, sea privá òf komunitario, i tambe di sakrifisio di misa, ku ta e orashon litúrgiko mas importante.

E promé lektura di awe ta bisa nos kon e komunidad apostólíko tabata dediká su mes na orashon, preparando su mes pa risibí Spiritu Santu primintí dor di Hesus, loke ta enserá un ideal i ehèmpel pa nos. Nos ta bai

splica kada un di e kuater finnan aki ku mester tin den tur orashon.

Nos promé preokupashon mester ta alabansa i adorashon. “Señor, siña nos resa”, nan a pidi Hesus na sierto okashon, i El a kontestá: “Boso bisa : Nos Tata ku ta na shelu, Bo nòmber sea santifiká”. For di e momento ei tur dia miases di kristian, instruí dor di Señor, nos ta tuma kurashi di ripitié. Adorá Dios ta, ofresé nos homenahe filial máksimo. Ta uni nos na e Angelnan di Bètlehèm pa kanta “Gloria na Dios den altura”. Ta biba e primisianan di eternidat: “Santu, Santu, Santu ta Señor”.

Demasiado bia nos ta lubidá e akshon di yama danki. Ser agradésidu ta fuente di benefishinan nobo, e ta elemental den nos relashonnan sosial, i e ta —manera nos ta bisa den misa— ”hustu i nesensario, e ta nos deber i salbashon, gradisí Señor”. Asina Kristu a siña nos i asina tambe nos mester hasié: “Hesus a tuma shete pan ku piská, a yama danki i a parti nan”. Laga nos ta gradesidu na Dios nos Tata pa tantu benefisio risibí, maske nos no ta konsiente di mayoria di nan.

Pidi pordon mester ta otro preokupashon den nos orashon. E gran tragedia di mundu moderno ta ku el a pèrdè noshon di piká, manera Papa Pío XII a bisa, i ta p’esei nos no ta sinti nesensidat di pidi pordon, ni nos ta duna importansia na e invitashon di e saserdote ora misa ta kuminsá i e ta bisa : “Rumannan, promé di selebrá e sagrado misterionan, laga nos rekonosé nos pikánan”. Dilanti di Hesus nos tur ta sinti nos komo pekadór: “Pedro a kai na rudia bisando, Señor bai fo’i mi, mi ta un hòmber pekadór”. Ku Hesus ningun hende lo a konfesá manera awor nan ta hasi. Den santa misa kada be di nobo ta aparese e nesensi-



dat de pidi pordon. Nos ta bisa : “Pordoná nos, nos ofensa manera nos tambe ta pordoná esnan ku a ofendé nos” i “Lamchi di Dios ku ta kita piká di mundu, tene piedat di nos”.

Nos mester pidi grasianan nobo. Laga nos pidi, pues ta loke Señor ke: “Pidi boso lo risibí”, “si asta boso ku ta mal hende sa na duna boso yunan kos bon, kuantu mas anto boso Tata den shelu lo no Spiritu Santu na esnan ku pidié.” Tin kos ku Señor ke pa nos pidié, pero otro oranan nos no sa. Nos aktitut mester ser manera esun di Hesus: “Tata, si Bo ke, tuma e kopa di sufrimentu aki for di mi, pero no loke Ami ke, ma loke Abo ke”. Nos tin sigur ku semper ora nos ta pidi bon, nos lo risibí, maske no semper nos lo risibí loke nos ta pidi.

E petishonnan ku ta enserá den e orashon di Nos Tata ta sin duda algun di esnan mas importante. **Esaki ta e kuater finnan di tur orashon.** Ta nesensario resa den privá i komunitariamente, ya ku esun ta pa e otro. No laga nos limitá orashon den un

solo pidimentu. Resa ta “TA ku Dios”, algun bia skuchando, otro bia papiando, i otro ora kontemplando manera e kampeño : “Ami ta mir’ é i E ta mira mi”. **Resa ta alabá Dios, ta yam’ é danki, ta pidi pordon i ta pidi grasianan nobo.**

E komunidad di Herusalèm tabata resa pa mantené nan speransa bibu. Nan tabata resa huntu. Nan tabata pone Dios den nan bida. Tin bia nos ta pensa ku Dios ta un personahe di emergensia, manera e dòkter òf e paipfeter. Nos ta yam’ é ora nos tin doló di kabes o ora e kranchi di awa no ta funshoná. Dios tin derechi di pasa bintikuater ora pa dia huntu ku nos. Si nos ta konsiderá nos mes kristian, Dios ta un miembro di famia, kende nos ta yama danki, kende nos ta konsultá pa nos desishonnan. Hopi famia kristian ta bin huntu anochi pa resa. Hopi ta bai misa di parokia huntu, komo famia mayor- i yunan. Famia ku ta resa uní, ta permanesé uní — un frase popular ta bisa. Si Dios ta serka di nos, E por realisá tambe e maraviosc

Sigui lesa pag. 12

Lo bo ta un triunfadó

E berdadero reto di nos bida ta den aseptá nos erornan i no pèrdè e kalmu pa logra ser doño di nos mes.

Ora egoismo no ta limitá bo kapasidat di stima. Ora bo ta konfia den bo mes maske tur hende ta duda den bo i bo stòp di preokupá bo mes pa loke nan ta bisa.

Ora bo akshonnan sea asina kòrtiku den durashon manera largu den resultado.

Ora ku bo por renunsiá na e rutina sin ku e ta alterá e metabolismo di bo bida.

Ora bo sa na distingui un sonrisa di un burla, i preferá e eterno lucha ku kompra di e viktoria falsu. Ora bo aktua pa konvikshon i no pa aplousu.

Ora bo por ta pover sin pèrdè bo rikesa i riku sin pèrdè bo humildat. Ora bo sa na pordoná tan fásilmente manera awor bo ta diskulpá.

Ora bo por kana huntu ku esun pover sin lubidá ku e ta un hende, i huntu ku esun riku sin pensa ku e ta un dios. Ora bo sa na enfrentá bo erornan, asina fásil i positivamente manera bo habilitat.

Ora bo haña satisfakshon compartiendo bo rikesa. Ora bo sa na opsekiá bo silensio na esun kende no ta pidi bo palabra, i bo ousensia na esun kende no ta apresia bo.

Ora ya bo no mester sufri pa konosé felisidat i no sea kapas pa kambia bo sentimentunan òf bo metanan pa plaser.

Ora bo no trata di haña kontestanan den e kosnan rondó di bo, sino den Dios i den bo propio persona.

Ora bo aseptá erornan, ora bo no pèrdè kalmu, e ora ei i úníkamente e ora ei, lo bo ta... UN TRIUNFADÓ!

FFB a deklará kampionato 2019-2020 nulo

KRALENDIJK--FFB ku ta e federashon di futbòl di nos isla ku ta bou di presidencia di sr. Ludwig "Luti" Balentin, a deklará kampionato futbòl 2019-2020 di nos isla nulo.

Tabata djabièrni último durante un reunion den oranan di anochi na Capt. Don's Habitat, reunion ku e timnan afiliá na e federashon di futbòl, ku a partisipá na e timnan di e

desishon tumá pa deklará e kampionato nulo.

Esaki debí na e krisis di koronavirùs, loke a tuma demasiado tempu kaba no aktivo.

Tampoko ta konosí eksaktamente ki dia lo por kuminsá ku futbòl di kampionato atrobe, sperando si ku lo ta pronto.

Ta konsiderá ku e temporada 2019-2020, no tabatin kampionato.

Ku esaki pues e temporada 2019-2020 ta keda konsiderá komo un temporada ku no tabatin kampionato.

Nos ta spera sinseramente ku mas pronto posibel lo sali fo'i dje gara di Covid19, di manera ku bala lo por kuminsá lora bèk riba nos isla, di kua lo kuminsá tambe di bia ku e temporada 2020-2021 di futbòl di nos isla.

Aworakí FFB i su timnan afiliá ta bai prepará pa asina ku haña "lus bèrdè" ku por kuminsá ku futbòl, kuminsá tambe ku kampionato 2020-2021 di futbòl di nos isla.

Nos ta deseá FFB i su timnan éksito i ku pronto lo por kuminsá ku e temporada 2020-2021 di futbòl di nos isla.

Buki 60 aña FFB.

E reunion djabièrni último tabatin solamente dos punto di agenda, di kua e otro punto tabata selebrashon 70 aña di FFB.

Por a komprondé ku pa e selebrashon di e 60 aña di e federashon, lo bini ku un "buki" ku historia di e 60 añanan di e federashon (FFB).

Obi Winklaar a tuma retiru fo'i Real Rincon

KRALENDIJK--Informashonnan ku a yega nos redakshon fin di siman pasá, pa ta eksakto djadumingu último, a musta ku e DT di s.v. Real Rincon ku ta sr. Obi Winklaar, a tuma su retiru fo'i e kampionnan di s.v. Real Rincon.

Nos a trata na establese kontakto ku sr. Winklaar pero no a logra.

Nos a tuma kontakto ku e presidente di s.v. Real Rincon, sr. Carlos Pourier, ku a konfirmá pa nos ku e informe ta korekto.

Tabata un siman i mei pasá ku s.v. Real Rincon a risibí e karta di retiru di sr. Winklaar ku pa medio di e karta ta pidi su retiru fo'i s.v. Real Rincon.

Direktiva di s.v. Real Rincon tabata sa ku esaki lo a bini ya ku na kuminsamentu dje temporada (kampionato), sr. Winklaar a duna di konosé ku ta su último temporada.

Di e forma aki pues, sr. Robert "Obi" Winklaar ku tabatin eksitoso tempordanan ku e kampionnan di s.v. Real Rincon komo DT, ta bandoná e organisashon di s.v. Real Rincon.

No ta konosí pa nos si sr. Winklaar lo bai un otro klup di futbòl ya ku nos no a logra establese kontakto kuné.

Tampoko ta konosí ainda kua ta e próksimo DT di e ekipo kampion.

NKN 40 a laga NKN 50 den tereno

KRALENDIJK--Nos Nos 40 riba un eror kostoso, a laga Nos Ku Nos 50+ den tereno den partido di sòftbòl amistoso i di treinen djadumingu último na Jossy Boekhoudt Ballpark na Tera Kòrà.

E dos timnan di sòftbòl di Asosashon Nos Ku Nos, djadumingu a bini huntu pa treinen i prepará pa ta den kondishon pa kualke

kompromiso ku presentá.

Riba un eror di Randy, NKN40 a laga NKN50 den tereno ku skor di 7-6.

Tabata un partido ku a bai 7 inen, di kua e picher ganadó di e partido ta Jemuel "Choko" Melaan.

Picher pèrdèdó di e partido ta Ashel Girigorie ku a tira dos ponche riba Concession i Kòkò.



Numbernan Importante | Sosten sosial pa famia

Riba dianan di trabou, durante orario di ofisina



Bo tin pregunta tokante virùs di corona na Boneiru?

rijksdienstcn.com/covid-19
0800-1351 (grátis)



Bo ke papia tokante di strès na kas òf tokante kon pa atendé ku yu?

Sentro pa Hubentut i Famia
701-5257



Bo ta preokupá pa seguridat di mucha?

JGCN
715-7201



Bo ke papia ku un trahadó di Tim di Bario?

Tim di Bario
717-1714



Bo famia mester di un pakete di kuminda? Of bo no por paga akohida pa mucha, WEB, hür (di kas), internèt mas?

yudami@bonairegov.com
0800-1351 (grátis)



Bo mester di ayudo ku lesa, skirbi òf yenamentu di papel?

Fundashon Forma
+599 785-7314 (yama òf WhatsApp)



Pa notifikashon agudo di violensia doméstiko, abusu di mucha òf otro situashon di emergensia.

YAMA 911
(semper alkansabel)



Bo ta víktima di kualke echo kastigabel pa lei i bo mester di sosten emoshonal?

Ofisina Yudansa
Pa Víktima
717-6181

Protehá bo mes i esnan rondó di bo

huntu **kontra** corona

Somafer N.V.

ta buska

1 Loodgieter

Pa mas infomashon yama na tel.

796-7434

Qredits ta ofresé:

Kredito transitorio pa empresa chikí i mediano

KRALENDIJK -- Qredits ta ofresé empresarionan finansiamentu pa sobreviví durante e krisis ekonomiko aktual. For di awe empresarionan chikitu i mediano por apliká pa e kredito transitorio yamá 'corona-overbruggingskrediet'. Esaki ta enserá un finansiamentu den e forma di un mikrokrédito di maksimal \$ 25,000.- ku un interes di 2% den e promé aña.

Di e manera aki Qredits ta ofresé un solushon pa empresarionan buskando fondonan di likides pa por sobreviví e temporada di krisis. "Asta awor ku e medidanan pa kontené e corona vírus a keda aliviá, empresarionan ta sigui sinti e sla kousá dor di e

krisis aki. E fasilidat di kredito benefisioso aki tei pa yuda kubri e gastunan i otro debenan finansiero di e empresa durante e krisis. Asina aki nos por sostené míles di empresario chikí i mediano pa nan por sobreviví durante e krisis di Corona." Segun Elwin Groenevelt, direktor di Qredits Microfinanciering Nederland.

Kredito

E kredito transitorio ta pa empresarionan eksistente. E kredito ta mará na un periodo di maksimal 48 luna i durante e promé 6 lunanan e empresario no mester pagá amortisashon di e fianza. E periodo di gracia aki por keda eks-

tendé ku 6 luna mas den kaso ku esaki ta nesesario. E empresario ta paga 2% di interes riba e montante di kredito durante di e promé aña i despues di e periodo aki un interes di 6.75% lo keda apliká. Un aspekto importante tambe ta ku e empresario por likidá e fianza na kualke momentu i sin paga but. Dor ku e kredito aki tin un karakter transitorio i ta relashoná ku e vírus di Corona, e 'corona-overbruggingskrediet' no ta adekuá pa empresanan nobo. Qredits ta gradisí gobièrnu di Boneiru pa e sosten ofresé. Danki na esaki empresarionan ku no ta kliente di Qredits tambe por apliká pa e kredito transitorio di Qredits

Bonaire. Den e temporada di krisis aki tambe empresarionan ku un idea inovativo, realisabel i duradero por apliká pa un Mikrokrédito serka Qredits.

Éksito

Den luna di mart Minister Wiebes a anunsiá durante un konferensia di prensa na Hulanda ku Qredits, ku e sosten di e Ministerio di Ekonomia i Klima, lo ofresé un areglo pa yuda su klientenan. Tur empresario ku un fianza di Qredits por a apliká pa yega na remarke pa un periodo di gracia di 6 luna durante kual e kliente ta paga solamente 2% di interes. Asina aki e kliente no mester amortisá su fianza

temporalmente i e ta risibí un redukshon substansial den e gastunan di interes ku e mester keda paga. Ku esaki e empresario ta risibí un sosten grandi pa tene kabes riba awa. Entretantu mas ku 55% di e klientenan di Qredits Boneiru ku gratitut a hasi uso di e areglo aki.

Mas ku kredito

Qredits ta ofrese krisis coaching tambe durante e temporada di krisis aki. Empresarionan por apliká pa un coach pa papia tokante solushonnan pa problemanan ku nan ta enfrentá aktualmente ku nan negoshi. Pa empresarionan ku ta buskando konosementu i insipirashon durante e periodo akí Qredits a introdusí, den kolaborashon ku Google.org, un wèpsait yen di teps i artíkulonnan informativo relashoná ku e temporada di krisis di Corona. Riba e wèpsait tin artíkulonnan práktiko tokante por ehèmpel: enfoká riba posibilidatnan, kon pa anda ku pèrdida di benta i kon pa keda positivo den e periodo di krisis aki. Tambe ta ofresé diferente shablòn ku ta disponibel pa download pa yuda bo haña un bista di bo situashon finansiero i teps pa keda den bista kliente i posibel kliente durante e periodo aki. Un parti di e artíkulonnan aki, tradusí na Papiamentu, ta disponibel riba e pagina di Facebook di Qredits Bonaire.

Ofresé mas ku kredito so, tambe den e temporada ansioso aki, ta lokual ku ta pas ku Qredits. Milagros Blanken, Branch Manager Bonaire: "Komo un isla chikitu nos desafionan ta grandi. Banda di esaki e fin di e krisis i su konsekuensianan (te ainda) ta duru pa pronostiká. Dor di esaki nos ta trata pa keda traha riba maneranan pa sigui sostené e empresario lokal pa nan por sobreviví den e temporada di krisis. Awor, mas ku nunca, nos ròl sosial komo dunadó di kredito ta sumamente importante."



Rudy ta komentá

Wikènt pasá e yònkuman aki, un di e úniko dos tianan ku mi tin na bida ainda, a hasi aña. Duru duru ainda ku yen di kos di konta. Pabien p'e i pa henter famia Domacassé. Awor laga ami konta boso un storia di Tio Chibu. Algun aña pasá nos tabata sintá riba malekon pabou di kas di Nena, kòmbersando. Atardi riba malekon tin hopi hende ta kana, i un dado momentu a pasa un chek ku si el a partisipá na Miss Boneiru, nan lo a pidi tur e otro kandidatanan pa hala tras, pasobra nan lo no tabatin chèns. Super bunita. Mi a bira wak Tio Chibu i a puntré: "Chibu, si un kuarenta aña pasá asina bo a haña un chek asina, kiko bo lo a hasi kuné?"

Tio Chibu a bira wak mi, hala dilanti un tiki, ku bos haltu i kara di un piskadó kla pa dal un piská ku chikoti, el a kontestá: "Ki kuarenta aña pasá kiko? Ta awor mi tin ku hañ'é pa mi mustra bo kiko mi ta hasi kuné."

Ku Tio Chibu, nos ta hari semper. Ku pa hopi aña mas e ta huntu ku nos pa nos sigui gosa di su storianan.



Maiky? Posada? Finalmente a bira Lac i esaki ta Lak su regalo: piská fresku, dushi drechá. Riba e foto no por mira e dos kùpnan di sòpi ku a bai promé ku esaki. Ta sòpi ku ta hasi bo wowonan skèrpi manera vèrekeiker. No tin ningun restaurant di 5 strea ku por kompetí ku e kushina di Lak. Pa no menshoná e ambiente natural dushi ku tampoko ningun lugá no por ofresé. Nos por por bai ku fakansi e aña aki? No tin nodi. Nos por bai Lak i gosa di un ambiente úniko i dushi.




Ai Djo, e pobenan. Mira nan bentá aki. Último tempu, mi a topa nan diferente biaha na Lac, i por ripará si ku nan kurpa a drecha hopi komiendo piská fresku. Pero ketu bai e dósis di kuminda di laman ta muchu haltu pa nan, i ora nan kaba kome, nan no por muf. Ta tuma tempu pa kustumá ora e úniko kuminda di laman ku nan sa haña, ta saldinchí. Pero mi ta gosa nan bon intenshon i ta spera ku nan ta sigui asina. Ku tempu, nan kurpa ta bin bei kompletamente. Kon ku bai bin, nan ta bon hende.

Pero boso sa ta ken tin kurashi? Ta e gainan aki. Nan ker a bin kobra mi karni di kabritu ku nan tata sa bin bende ku Machi Dodo. Nan no sa ku ora kunukeronan trese kuminda di kunuku pa piskadónan, ku e kunukeronan aki tabata haña piská fresku bai kuné pa henter bario?

Tur chansa un banda. Nos a pasa prèt un ratu, ku yen di storia, i gosando di e ambiente di Lac.



Prevení fèrkout, grip i e vírùs di corona



Laba man

Laba bo man bon durante **30 sekònde** ku skuma i awa.




No mishi

No mishi ku **wowo, nanishi òf boka**. Via e lugánan akí bo ta pega ku e malesa.



Kubri

Tapa bo boka i nanishi ora bo ta **tosa òf nister** ku un lensu di papel òf e doblá di bo èlebog.



Distansia

Mantené un distansia di alomènos 1.5m di otro hende.

Kiko ta vírùs di corona nobo/COVID-19?

Tin un brote internashonal di COVID-19 (konosí tambe komo vírùs di corona nobo) na e momentunan akí. E vírùs por okashoná síntoma manera kentura, tosamentu i halamentu di rosea anshá. Den un kantidat di kaso limitá el a kondusí na infekshon mas serio, asta morto.

Kontakto:

Liña di informashon vírùs di corona

☎ 0800 1351 (grátis)

+599 715 9199 (pa yamada internashonal)



OPENBAAR LICHAAM
BONAIRE
SAMENLEVING EN ZORG